


MULUKU OOWERYA

ONUUPULULIWA OHOOLO WAHU

 Kookhalana Solempwa kamosa kamosa silmpwe, mwa seiyo miyo kaatthun'aka wira koleeliheryeni, ni kinniroromela wira Muluku onooreeriha wiilipiha wahu wooteettheya.

² Vano, atthu anci-ene annitthunaka osuwela mwaha wa xeni hiyo nnikh'al'ahu ootikiniha ni oonyakula. Moosuwela, ola muthinto mmosa woovirikana wa—wa muthukumano ovikana ole atthu ali—alimalenly'aya wona. Ni, voolimaleleya, itthu sothene ti ya enamuna yoorehereriwa. Masi hiyo naarw'aka mithukumano iya, seiyo sikh'anle mureerelo aka vano mwa iyakha sinci-ene okhuma okathi sipaceriw'aya, ni ennirikela hiyo osuwela etthu enrow'ahu wira. Hiyo nnimoorwa paahi ni wiivahererya. Eyo t'itthu emosa hiyo ensuwel'ahu wira. Nto Muluku onimwiira ele enihala. Vano eyo ennikhaliha hiyo atthu a mweettelo mmosa wawihu.

³ Nihiku nno, mutthu mmosa aahimye wira, “Moosuwela, vekeekhai nyuwo m'watthu ootikiniha.”

Miyo khwira, “Ahe, miyo—miyo kinoona wira ti siiso.”

⁴ Nto miyo kinnuupuwela mmosa wa mithukumano. Munna Troy emara emosa aakihimeerya mwaha wa mutthu mmosa a wAlemanha aahimya wira aahaakhela opatiiso wa Eroho Yowarya. Nto mmeeloni mwaya, opasari memmo w'avar'awe muteko, owo aanivenxa matata awe ni waattotopela Apwiya, n'ulavaula ilavulelo ni wira siiso, vootikiniha. Nto vookiserya, mwaneene khurwa khwira, “Heini, exeni eniwiirani?”

⁵ Owo khwira, “Oh, miyo kirimoopowa.” Owo khwira, “Murim'aka onootekhuma n'utthapa paahi.”

⁶ Owo khwira, “Vano, alakela nyuwo mootoko okhala n'anamukhwa-anepa ale iwe.”

⁷ Owo khwira, “Ayo. Avuwihwe Muluku!” Khwira, “Kinnaaxukhuru Apwiya mwaha w'anamukhwa-anepa.” [Nttaava n'Enkelesi namukhwa-anepa ni epooroka ya eparafuuso nsina nimosā—Mot.] Owo khwira—owo khwira, “Nyuwo mukuxe ekaro, eneetta muramphani.” Khwira, “Nyuwo mwakumiharu ipooroka sothene sirin'aya, khenihala hat'etthu woohikhala nikuttha na 'nikwankwara.” Nto eyo pahi...Ti yeyo pahi, moosuwela.

⁸ Nihiku nimosā, oCalifornia, miyo kaamweetta iphiro s'oLos Angeles, nto kimoona mulopwana mmosa aarina epaphelo vathirima wawe, ni *va*. Nto aahimya wira, “Miyo ki namukhwa-

anepa mwaha wa Kristu.” Nto atthu othene yaamuweha yowo. Nto miyo kaanaaweha awo orukunuwa n’umuweha, vaamal’awe ovira. Nto miyo kuupuwela orowa n’atthu akina. Nto mma. . . mmakhatani mwawe, yaahimya wira, “Nyuwo mwa namukhwa-anepa aawani?” Ayo. Miyo kinoona wira hiyo n’otikiniha vakhani, mmosa ni mukhw’awe, nyuwo moosuwela.

⁹ Masi, nyuwo moosuwela, olumwenku onikela moolimalelani, mpakha etthu emosa yoovirikana enikhal’aya yootikiniha, mpakha atthu vekeekhai wuupuwela wira yookhala etthu ehilonke. Nto voolimaleleya Muluku ohaana wira etthu yootikinihaxa, wira aatthikelihe atthu mBiliani tho.

¹⁰ Miyo kinniwerya otthokelela wira Nowe aari na—namukhwa-anepa, wa okathi ule wa siensia owo aakhal’awe, okhala wira awo yaaniwerya wooniherya wira khayakhanle hata maasi osulu. Masi Muluku aahimye wira yaamukhala-wo iwe. Tivo, Nowe, alaleyaka ni aaminiki yeyo, owo aari namukhwa-anepa.

¹¹ Ni kaamutthokelela wira okathi Moise waaronw’awe wEjitu, owo aari ntoko na—namukhwa-anepa, wa Farawo. Masi muupuwele, Farawo aari namukhwa-anepa, wa yowo, nave. Vano awo. . . Hiyo ninniisuwela eyo.

¹² Hata Yesu aanyiheriwa ntoko namwiikawanya. Ti yeyo. Martinho Lutero aari namukhwa-anepa, wa ekereja Katolika. Ni John Wesley aari namukhwa-anepa, wa m’Anglikano. Vano, nyuwo moosuwela, ola—ola okathi wa namukhwa-anepa mukina. Nyuwo khamunuupuwela siiso? [Muthukumano oniira, “Amen.”—Mol.] Masi, ehinatthi okhala epooroka, nyuwo moosuwela, ehaana okhala eparafuusu, toko, wira ekele-mo.

¹³ Vano, nyuwo moosuwela, Nowe, aryeene namukhwa-anepa, owo. . . Enikuxiwa epooroka, khipurula eparafuusu, khuttopanyerya etthu vamosa, khivarelela etthu. Vano, Nowe aaniwerya waapurulela mukalawani, othene ale yaamini, aakhumihaka molamuliwani, ari-ene namukhwa-anepa.

¹⁴ Hiyo ninnoona wira, Moise aahipurula ekereja aroiha ota wa Ejitu, ary’ene namukhwa-anepa. Ti yeyo.

¹⁵ Miyo kinoona wira ninnimutthuna namukhwa-anepa vano, wira ampurule Mwaakameliwa amukumihaka mukereja. Hiyo ninnitthuna etthu emosa vano, mukina, vano hiyo na muthinto mmosa w’atthu ootikiniha vanci-ene. Nto miyo kaahuupuwela, ohiy’ula, Apwiya yatthuna, kaamweererya osoma Solempwa kamosa kamosa sinihimya yela, ni olavula ni nyuwo okathi vakhani, ni weererya owoonihani mwaha wa xeni nikhanly’ahu atthu ootikiniha.

¹⁶ Nrowe nikhunle Solempwa vano, mwa aFilipi kapitulu 2, 1-8, ni aKorinto Aneenli 3:6. Nto nrowe nisome, okhala wira ninnaamini Masu a Muluku.

17 Nto vano, okathi vakhani nihinatthi osoma, nrowe nuuramihe miru sahu wira nivekele.

18 Tithi a Wirimu Oothunku, hiyo vekeekhai n'atthu ooreeriwa, ohiy'ula, mwaha w'okhalaka okathi ula, ni wona itthu hiyo sinoon'ahu siiraneyaka, ni osuwela wira okathi ori vakhiviruxa, Yesu vanrow'awe orwa mwaha w'Ekereja Awe. Oh, eyo ennitthapiha murim'ahu, Pwiya! Ni okathi onikhunl'ahu makukhu, ohiy'ula, hiyo ninvekela wira Nyuwo munivahe y'ohimya ya y'osoma ela. Ni wira Eroho Yowarya yuupululele mmurimani mwahu itthu saarowa okhala sooreera ni s'omusiveliha Muluku. Maana hiyo ninvekela mwa Nsina na Yesu. Amen.

19 Nyuwo moosuwela, kinoona wira kinrowa woovekelani wira etthu emosa. Miyo—miyo voolimaleleya kinvekelaka itthu sootikiniha, ni miyo kinroromela wira nkinvekela etthu yootikinihaxa. Masi okathi hiyo onivah'ahu nttitimihio epantera ahu, hiyo othene ninnivenya. Nto—nto epantera enoovira, hiyo ninneemela; yeyo, yaatthuneya. Nto hiyo ninneemela, wira nikhomase. Nrowe nivenye okathi onsom'ahu Masu, xontte, aKorinto Aneenli 3:6.

Yoowo...t'onikhalinhe oowerya okhala arumeyi a waataana wa naanaano; kahiyo a yoolempwa, masi a erooho: okhala wira yoolempwa enniiva, nto erooho ennivaha ekumi.

Masi vaari wira—masi vaari wira muteko wa ikano, silempwe ni sithittiwe vamalukuni seiyo sinruuha okhwa, waari woovuwa, mpakha aana a Isarayeli vahaavery'aya oweha owiitho wa Moise mwaha wo warya w'owiitho w'awe; waari woohilekela:

Vano muteko wa erooho khawaarowa okhala wootepaxa ovuwa?

Maana vakhala wira muteko wa ikano sinruuha otthukweliwa waari woovuwa, onnitepaxa muteko waxariya okhala woovuwa.

Tthiri vekeekhai yeyo yaari yoovuwa khalai vano kahiyo etthu ohoolo w'ovuwa wuulupalexa wa naanaano.

Maana vaari wira etthu yoohilekela yaari yoovuwa, sai...wala ennitepaxa ele ehinvira okhala yoovuwa.

Tthiri nikhalanaka nrromelo siisa, ninnitepa olavula ni wiilipiha.

Nave kahi ntoko Moise, yowo aakhuneela n'ekuwo owiitho w'awe, wira aana a Isarayeli ehoone oratta-ene waamalel'aya ele yahaalekela:

Masi ankhili aya aattiyeliwa: tthiri mpakha olelo va ekuwo yeeyo-tho enihala ekhuneeliwe yaasomaka

waataana wa khalayi; ekuwo yeeyo enikhunuliwa mwa Kristu.

Masi mpakha vano, aasomiwaka Moise, ekuwo ennikhuneela murim'aya.

Vano yarukunuxa murima mw'Apwiya, ekuwo eyo enookumihwiwa. Kahi . . .

Vano Apwiya ti Eroho yeyo: nto vaavo vankhal'aya Eroho y'Apwiya, vaavo vaakhala-vo otaphuwa.

Masi hiyo othene, ni owiitho wookhunuliwa ninoona ntoko muloolani ovuwa w'Apwiya, nitatuxiwaka nilattanihiwaka ni yoowo mwa ovuwa ni ovuwa, ntoko mwa Eroho y'Apwiya.

²⁰ Ni mwa aFilipi 2, ninsoma ela, nipaceryaka eversikulu 1, ni nisomaka mpakha eversikulu 8.

Vaari—vaari wira onnikhala ohakalala mwa Kristu, vakhalaka olipihwiwa murima wa ophenta, . . . waataana wa Eroho, wakhala ophentana mukina ni mukhw'awe w'omoriwa ikharari,

Mmaleliherye otteeliwa waka murima, wira mukhalaneke wiwanana, mukhalanaka ophenta omosaru, mukhalaka ni murima mmosaru, ni muupuwelo mmosaru.

Ehikhale etthu eniir'anyu n'uxinttana wala wiittottopa; masi mwiiyeviheke khula mutthu awooneleke vatthu akhw'awe voowivikana mmansawe.

Ahikhale mutthu onwehexexa itthu sawe, masi khula mutthu nave-tho . . . itthu s'akhw'awe.

Mukhalaneke muupuwelo yoowo mwa nyuwo, yoowo tho waari mwa Kristu Yesu:

Yowo, ari-ene ekhalelo ya Muluku, khaatthunne okhala alikanaka ni Muluku:

Masi aahiyeviha mmansawe, khwiikhalaha murumeyi, khukhalihwiwa oolikana n'atthu:

Nto ooneyaka ni makhalelo ntoko mutthu, owo aahiyeviha mmansawe, aikhalihaka oowiiwelela mpakha okhwa, okhwa wene vamwiikimanyo.

²¹ Nivekele.

²² Tithi a Wirimu, Masu ala maalupale amanle osommwa, ohiy'ula, mwa Solempwa Sanyu Soowarya, mukhalihe Yawo eekeekhaixa mmurimani mw'ahu, wira hiyo nikhume va sintoko ale yaarowa wEmausi, niiraka, "Mirima sahu kisaaniviha mwa hiyo okathi Owo aalavul'awe ni hiyo mphironi?" Maana hiyo ninvekela mwa Nsina na Yesu. Amen.

Mukilaathiki.

23 Vano, ela y'osoma emosa yootikinihaxa, masi kinoona wira ti yoophwanelaxa okathi yola. Miyo kaatthuna kilavule mwaha wa: *Muluku Oowerya Onuupululiwa Ohoolo Wahu.*

24 Vano, vapaceny'awe okhala mutthu, ennikhala etala mmurimani mwa mutthu, wira asuwele vatthu vakhummy'awevo, ni mwaha wa xeni owo okhalenly'awe mu, ni otthu onrow'awe. Ori Mmosa paahi oniwerya waakhula yeyo, Owo ti Yole omuruun'he mu. Nto mutthu okathi wothene onnitthuna omoona Muluku.

25 Ottuli mwa Waataana wa Khalai, hiyo ninoona wira Muluku aniisiipithiha Mmansawe w'ale oohaamini. Muluku ookhalana enamuna yootikiniha vanci-ene wo weetta n'atthu. Owo onimwiisiipithiha Mmansawe wa ole oohaamini ni oniisooniherya Mmansawe wa ole oowaamini. Muluku oniira siiso. Yesu ohaaxukhuru Atithi, wira, Awo ahiipithiha itthu iya w'ale oosuwela ni a miruku, khiwuupululela axikhani wira awo amusuwele. Vano, hiyo ninnoona wira Muluku khanrukunuwa, mwa mukhalelo Awe, ni Owo okathi wothene onivara muteko Awe enamuna emosaru. Hiyo ninnoona, mwa Malakhiya 3, wira Owo ohimnye wira, "Miyo ka Muluku, ni nkinrukunuwa." Vano, Owo onivara muteko mwa enamuna emosaru, okathi wothene.

26 Vano hiyo nnikuxa emosa wa iliivuru sa khalaixa mBibiliani. Okathi Yobi, mmosa w'atthu oomalela okhalana exariya a mahiku awe, mutthu oomalela oloka mwa ikano sa Muluku, murumeyi, murumeyi oophwanela, a nttittimiho, mpakha Muluku wira, "Khaavo hata mmosa onlikana ni yowo, elapo ya vathi." Masi. . . otthuna wawe, emara emosa, omoona Muluku. Owo aanisuwela wira aahikhala Muluku, ni aahoona wira aanitthuna omoona Yowo, wala, ahiso, orowa owanny'Awe omana mukhora, ni wira, "Miyo kaanitthuna olavula ni Nyuwo." Okilaathi, olavula ni Yowo, ntoko hiyo saarow'ahu wira mmosa ni mukhw'awe.

27 Hiyo nookhalana ankhili. Tivo hiyo nry'ahu mmithukumanoni mu, mwemmo onthukuman'ahu ni—n'uhimya miyuupuwelo sahu. Ni—ninniiwana mmosa ni mukhw'awe, vooreera, okathi onlavul'ahu itthu mmosa ni mukhw'awe. Ni arumeyi anniira yeyo. Atthu a miyeettelo sothene sa makhalelo anniira eyo, olavula itthu.

28 Nto, Yobi, Muluku aari eekeekhaixa wa yowo, owo aatthuna osuwela sinto khivaaweryaneya owo orowa, omana mukhora Awe, ni—ni okhalana nva—nvaanelo ni Yowo.

29 Masi hiyo ninoona wira Muluku aahilavula ni yowo, masi Owo aari owiisiipithiha. Owo aari owiisiipithiha mwa mukhalelo w'eyuupuru. Nto Owo khumuhimeerya Yobi wira eemele ailikanyihe; Owo aarowa olavula n'uwo, ntoko mutthu. Vano Owo aahikhuruwa muyuupuruni nto—nto khulavula ni Yobi. Vano Owo aaisuwelin'he wa Yobi muhina mwa eyuupuru,

enamwi nlelo owo ahamoonne Owo oratteene. Owo aawerya paahi wiiwa ephoyo erumaka ni erukunuwaka, mmirini. Vano Nsu naakhumme muhina mwa eyuupuru, masi Muluku aaipinthe muyuupuruni.

³⁰ Hiyo ninniphwanya, wAfrika, wAfrika du Sul, awo anihimya nuulumo *amoyah*, nenno nnihimya, “ikuru sihinooneya.”

³¹ Nto Ikuru seiya sahooneya, muhina mwa eyuupuru, saahikhalana Nsu nowiiweya. Nno naahilavula ni Yobi, nnakhala vo owo khoonne mukhalelo Awe. Masi Owo aari owiisiipithiha, wa yowo, ni eyuupuru.

³² Hiyo ninooona wira mmosa wa maprofeta aalupalexa a mBibiliani, Moise, a Waataana wa Khalai, mmosa wa arumeyi a Muluku oothanliwa, oovalaanyiwa, oothommwa, owo nave-tho aahiphavela omoona Yowo. Owo aahikhala vakhiviruxa ni Yowo, ni aahoona itthu sinci-ene sa ntata Nawe nuulupale ni na siiri naarowa ohoolo wawe ni niiraka itthu seiyo aawerya ovara Muluku paahi. Owo aahiphavela omoona Yowo nihiku nno, nto Muluku khimuhimeerya, “Murowe, mwakhale vamwala.”

³³ Nto okathi aary’awe vamwala, Moise aahimoona Yowo ovira. Owo aahoona muthana Awe. Nto owo khwira, “Aakhala ntoko mutthu, muthana wa mutthu.” Nnakhala vo, owo khaamoonne Muluku. Owo oonne ekuwo ya Muluku.

³⁴ Bibilia ohimnye wira, “Khaavo otonko omoona Muluku hata okathi mmosa, masi Mwana Mmose-ene ori mw’Atithi t’omusuwelin’he Yowo.” Tivo, Moise aamoonne, owiisiipithiha, ntoko Mutthu. Hiyo ninooona wira Yehova a Waataana wa Khalai aari vekeekhai Yesu a Waataana wa Naanaano.

³⁵ Nto—nto Dr. Scofield va, hiyo ninooona wira, nuulumo nawe, orukunuwa “mukhalelo.” Hiyo ninniphwanya nuulumo *en morphe*, mw’Ekereku, nenno nnihimya “ele ehinooneya yookhalihwiwa yowooneya.” Etthu emosa ehinweryaneya. . . Hiyo noosuwela wira eri vale. Enniweryaneya. . . khenweryaneya wooniwa, masi nlelo hiyo noosuwela wira eri vale. Nto okathi Owo orukununx’awe mukhalelo Awe, wa *en morphe*, yowo onihimya wira Owo oorukunuwa mukhalelo w’ovikana ephattu khukhala ntoko y’ephattu.

³⁶ Nto Owo aamurukununxe namakhupi Awe, mwa enamuna ekina, enikhala ntoko eteaaturu. Owo aavara muteko. Nto mw’Ekereku, okathi aapatiliw’awe namakhupi, khino erattelo emosa. . . muratti mmosa aanikumiherya ipante sinci-ene soovirikana.

³⁷ Nto mwan’aka mwamuthiyana, ori vaava, awo yaahikhalanasa oxikola yuulupale, e—eteaaturu. Nto mmiravo mmosa kaamusuwel’aka, aanivara ipante soophiyaka xexe, masi owo aamurowa ottuli w’epaalku n’umwakakhanya nama—

namakhupi awe, wira akhume, wira amutakiherye mutthu mukina.

³⁸ Vano, nyuwo mwakuxaru soohimmwa ni maprofeta a Waataana wa Khalai sinihimya ele Mesiya aary'awe wira akhale, nyuwo pooti olikanyiha yeyo ni makhalelo a Yesu, nto eniphwanyaneya siiso ntoko Yesu aary'awe. Owo khaari mutthu pure paahi. Owo aari Muluku, *en morphe*. Owo aaroorukunuwa okhuma—okhuma mukhalelo w'ovikana ephattu khukhala mukhalelo w'ephattu wa Mutthu. Vano, Owo aari Muluku, owooniheriwa v'erutthuni, ookhuneliwa ni mutthu, n'erutthu.

Nto nwehe Waataana wa Khalai.

³⁹ Miyo—miyo—miyo koosuwela wira kinlavula ni muthukumano wootakahereya, ohiy'ula, wa mapuro oohinahiyana a mulaponi. Nto hiyo nri va wira nisuwele. Exeni hiyo—exeni hiyo eniir'ahu? Exeni—hiyo n'ani? Ninrowa vai? Eniiraneya exeni? Sothene iya sinihimyani?

⁴⁰ Nto vano hiyo ninnoona, mu, wira, vaari wira nyuwo aYuta alopwana n'athiyana, ni marabbi m—m—mpani mwa muluku, mahiku avinre, awo yaamuwen'heru Biibilia orateene, oprofeta, ohiya ilimalelo, awo yaamusuwela t'ani aari Yesu. Awo khayaakhalakhala amwiihanaka Owo Pelizepuli. Awo khayaakhalakhala amukhomelaka Owo. Masi, sothene iya saahaana wooniheriwa. Eyo yaari epantte ya eteaaturu. Ni awo yaahiripihiwa owiitho, mwa mwaha ola.

⁴¹ Eri ntoko anci-ene a nyuwo alopwana, athiyana, mu ohiy'ula, khino a ookathi aka wala owunnuwa vakhani. Nyuwo munnuupuwela, wAmerika nno, iyakha sivinre, ehinatthi... Muchiina... Munn'aka, osuwelihiwe va, eyo erwiye mmuruni mwaka okathi waalavul'aka ni yowo. Moota awo yiirak'aya... Awo khayaawerya olavula Enkelesi, ni awo—awo yaarina nipuro n'okattha. Nto nyuwo mwaamurowa nipuro nawe n'okattha, wira sikatthiwe ikuwo sanyu. Mu—mulipa ookattha Muchiina aakuxa epaphelo, khukhera mwa enamuna emosa. Nyuwo mwaakuxa epantte emosa y'epaphelo; owo aakuxa epantte ekina. Masi okathi waarw'anyu wira mukuxe eri yawinyu, ipantte iye piili sa epaphelo saahaana olikana. Nto iyo saahilikaneru oratteene... Khivaaweryaneya nyuwo otakiha hata mota xeni, 'okhala wira owo aakhalana ekapatti emosa ni nyuwo mwaakhalana ekapatti ekina. Nto vakhala wira yaamutakiha... Nto nyuwo mwaamukhalana ehakhi y'okuxa yaari yawinyu. Nto vo nyuwo mwamukuxa ele yaari yawinyu, mwakhalanaru epantte ekina y'evarihanelo.

⁴² Vano ti siiso, ohiy'ula, okathi onkhalan'ahu epantte ekina y'evarihanelo. Okathi, Muluku omukhenry'awe Mwan'Awe ipantte piili, oKalvario, khikuxa erutthu wira ekhale Mukuttho, khuveleeliha Erooho wa hiyo, yeyo yaatonko okhala mwa Mutthu, Yesu. Muluku mmosaru yowo ori owiipithihiwa

ohiy'ula, mwa mukhalelo wa Eroho Yowarya. Ikapatti iye piili sihaana olikana, vano nyuwo mwa epante y'evarihanelo. Muluku iirale yela, wira akhale oosuweliwa oratteene ni mutthu, okathi Owo Mwanene iipank'awe Mutthu.

⁴³ Miyo kaasoma ehantisi emosa, iyakha sivinre. Nto mw'ehantisi yela, yaahimya wira mwene mmosa muulupale, oosuweliwa. . .Miyo kooliyala nsina nawe, vano. Miyo nkuupuwelela olavula ehantisi ila. Eyo, alakela muupuwelo, masi eyo enniniphiiha nipuro nimosa vannivahaya mulipiheryo w'etthu hiyo emphavel'ahu ohimya. Mwen'ola, owo aari mwene munethi, ni aanaaphenta vanci-ene atthu awe, mpakha, nihiku nimosa, ohoolo wa—wa musunka awe ni atokwene oomwene awe, owo iiraly'awe, “Olelo, nyuwo munookoona emara yookiserya, wa iyakha sinci-ene.”

⁴⁴ Nto musunka awe n'anethi awe khumuhimeerya, “Mwene ooreera murima, munihimeryani siiso? Munrowa elapo y'okhopela, nipuro nimosa, wira mukhale a elapo ekina?”

⁴⁵ Owo khwira, “Nnari. Miyo kinrowa okhala vaava. Vano,” khwira, “Miyo kinrowa okhuma eriyari y'atthu aka. Kinrowa okhala mulimi. Kinrowa othaya ikhuni ni nakhuni. Miyo kinrowa o—opwattha etthaya ni namuteko. Kinrowa ovakulela miri n'ale anvakulela miri. Kinrowa okhala mmosa wa yawo, wira kilimalele oratteene itthu iye awo aniir'aya. Ni miyo kinnaaphenta. Nto miyo kintthuna kikhale owaalimalele oratteene yawo, mmansaka. Awo khanrowa okisuwela. Masi, nlelo, miyo kintthuna kikhale owaalimalele yawo, siiso.”

⁴⁶ Nto voosiisu aya, okathi alipa-ookhaliherya awe, atthu awe othene amoonaly'aya, ahiso ale yaari mpani mwa mwene, orula nleha nawe khupweha vakhaterani, veehicieni; khirula nlaya nawe, khuwara ikuwo sa mulimi, ni weettasa eriyari y'atthu pure.

Vano, mwa ehantisi iyo yaamukhani, hiyo ninnisuwela nto mwaha wa Muluku.

⁴⁷ Awo khumuhimeerya mwene, khwira, “Mwene, hiyo ninnootthunani nyuwo. Hiyo ninnoophentani. Hiyo—nintthuna nyuwo mukhale mwene.” Masi owo aatthuna okhala mmosa aawo, wira aasuwele oratteene, wira awo amusuwele owo oratteene, vekeekhai ele owo aary'awe. Eyo yaamuwooniherya awo oratteene ele owo aary'awe.

⁴⁸ Nto eyo t'ile Muluku iiraly'awe. Owo—Owo aarimwiirukunuxa Mmansawe, w'okhala Muluku Yehova, wira akhale mmosa a hiyo, wira ahaawe, wira alawihe okhwa, wira asuwele moota saary'aya ikuru sa mokhwani, n'ukuxa ehukumu ya mokhwani mwa Yowo. Owo aahipweha N—nleha Nawe ni nlaya Nawe, khukhala mmosa wa hiyo. Owo aahirapiha inawu n'ule—n'ule—owiiyeviha. Owo aahikhala mmaxaaxani, n'ale oohaawa. Owo aahirupa mu—mutakhwani ni mphironi,

n'ale yaari oohicaliwa. Owo aahikhala mmosa a hiyo, wira Owo awerye onisuwela oratteene, ni wira hiyo niwerye omusuwela Owo oratteene.

⁴⁹ Vano, miyo kinoona wira, mwa yeyo, hiyo ninnoona wira, airukunxaka, Mmansawe, yeyo Owo iiraly'awe. Nyuwo mwaweha, Owo aaruule mwa nsina n'ana araru. Owo aaruule mwa nsina na Mwana a mutthu, ni mwa Mwana a Muluku, ni mwa Mwana a David. Owo aahirwa ntoko Mwana a mutthu.

⁵⁰ Vano, mwa Ezekiyeli 2:3, Yehova, Mwanene, aamwihanne Ezekiyeli, profeta, "mwana a mutthu."

⁵¹ *Mwana a mutthu* enihimya "profeta." Owo aahaana orwa siiso, wira ammaliherye Otumererya 18:15, yeyo Moise aahimmy'awe wira, "Apwiya Muluku anyu anoomuthanla eriyari anyu profeta oolikana ni miyo." Owo khaatonko wiisihana Mmansawe Mwana a Muluku. Owo aahimye Mmansawe, "ntoko Mwana a mutthu," okhala wira Owo aahaana orwa attharihaka Solempwa. Munnoona? Owo aahaana okhaliha ikapatte iye piili sa epaphelo yookheriwa, oprofeta wa Waataana wa Khalai ni mukhalelo Awe Mmansawe, wira sikhale etthu emosaru. Tivo, Owo aaruuly'awe, ntoko Mwana a mutthu, aaruule enamuna yeyo.

⁵² Nto hiyo ninnoona, vakhwiyawe, khuvithiwa, n'uhihimuwa, Owo aahirwa Nihiku na Pentekosite, ntoko Mwana a Muluku; Muluku, Eroho, mwa mukhalelo, Eroho Yowarya. Exeni Owo iir'awe? Owo aamwiirukunuxa Mmansawe, aikhalihaka Mmansawe oosuweliwa n'atthu Awe mwa mukhalelo woovirikana. Ntoko, Eroho Yowarya, yeyo ekhanle Muluku, Owo aarwiye wira muhina wa okathi wa ekereja, ntoko Mwana a Muluku, Eroho Yowarya.

⁵³ Masi, oMileeniu, Owo onirwa ntoko Mwana a David, wira akilaathi veehicieni ya David, Mwene. Aari wira Owo akuxe ehice ya David. Owo ori veehicieni y'Atithi vano. Nto vo Owo ohimye wira, "Ole onrowa oxintta onookilaathi ni Miyo veehicieni Vaka, ntoko Miyo sixinttaly'aka khukilaathi veehicieni v'Atithi Aka." Tivo, Owo, oMileeniu, Owo onrowa okhala Mwana a David. Exeni iyo? Muluku mmosaru, okathi wothene, amurukunxaka nama—Namakhupi Awe paahi.

Miyo, w'amwar'aka, ka iy'aya.

⁵⁴ Nyuwo mooweha? Muthiyana ooSiro-oFeniisiya aahimye wira, "Nyuwo Mwana a David, mukimorele ikharari." Owo, hata khiyaamuhaanxe Owo, nnakhala. Owo khaarina ehakhi y'omwiihana Owo siiso. Owo khaarina ehakhi mwa Yowo ntoko Mwana a David. Owo aari. . . Owo Mwaana a David, wa muYuta. Nto vano Owo orwiye. . . Masi okathi owo omwiihanne awe, "Pwiya," Owo aari Pwiya'awe, vano owo aahaakhela ele aavekenly'awe.

Vano, ntoko, Owo onimwiirukunxa Mmansawe paahi.

⁵⁵ Vano, owannyaka, miyo ka atthu araru oovirikana. Owannyaka, amwaar'aka arina ehakhi ni miyo ntoko iy'aya. Mwana'aka ole vale, khorina ehakhi mwa miyo ntoko iy'awe; miyo k'atithi awe. Nto mwamusulu aka vale, miyo k'apwaapu awe, vano owo kharina ehakhi y'okiihana tithi. Miyo nkhiyo atithi awe. Mwan'aka t'ori tithi awe. Miyo k'apwaapu awe. Masi nlelo ka mutthu mmosaru.

⁵⁶ Ni Muluku, etthu Owo oniir'awe, Owo onimwiirukunxa Mmansawe paahi, wira akhale a nloko nenno, wira aisuwelihe Mmansawe w'atthu yawo. Nto ti yeyo nry'ahu va wira nisuwele, ohiy'ula. Mwa enamuna xeni entthuneya wira Muluku aisuwelihe Mmansawe w'atthu ala ni okathi ula? Owo onimurukunxa namakhupi Awe, Owo onirukunxa mairelo Awe, masi Owo khanrukunxa otthuna Wawe. Owo khanrukunxa mu—mukhalelo Awe. Owo ommurukunuxa namakhupi Awe paahi, okhuma mmosa ni mukina. Owo onniira yeyo, wira aisuu pulule Mmansawe voowooneyaxa w'atthu, wira awo amusuwele Owo t'ani, ni ele Owo okhanly'awe.

⁵⁷ Mwa aHeperi 1, nnisoma wira, “Khalai, Muluku aahaalavuliha axitiith'ahu n'ianamuna sinci-ene, ni moolumo a maprofeta, masi mahiku ala ookiserya mwa Mwana Awe, Yesu.”

⁵⁸ Vano, “Maprofeta,” Yesu ohimnye wira, okathi Owo waary'awe mulaponi mu, “awo yaari amuluku. Nyuwo munniwiihana 'amuluku,' ale jaarweela Masu a Muluku. Nto khasinweryaneya Solempwa ottipihwiwa,” Owo ohimnye wira. Ohimnye wira, “Muniwerya sai omulamula Ole nto, Owo akhala Mwana a Muluku?” Munnoona?

⁵⁹ Masu a Muluku annivahereriwa khula okathi, yeyo entthuneya Awo okhala. Nto Yesu aari omaliheriwa w'oprofeta wothene. “Mwa Yowo waakhala oMuluku wothene woomalela mw'erutthuni.” Owo waari mwa Yowo. Owo aari Ole aari mwa Yosefe. Owo aari Ole aari mwa Eliya. Owo aari Ole aari mwa Moise. Owo aari Ole aari mwa David, mwene ookhoottiwa.

⁶⁰ Atthu awe ene yaahimukhootta, ntoko mwene. Nto okathi owo waakhum'awe va—vaniyateni, mutthu mwamukhani, ooxanka apuruleyaka, khasiveliwa ni ku—kuvernu awe, eyeettihelo awe, ni yaahimusenyerya owo. Nto musunka khimpurula xoowa awe, khwira, “Kinoohiyererya muru ule wa mwalapwa mwa yole, amusenyeraka mwene aka?”

⁶¹ Nto David, alakela ahisuwelaka etthu iir'awe okathi ule, masi owo aari ooreerihwiwa. Nto owo khwira, “Mmuhiye. Muluku t'omuhimeenrye wira aire yeela.” Vano owo khuwela vamwako khimunlela Yerusalemu, mwene ookhoottiwa.

62 Nyuwo mooweha? Iyakha imiya vakhani okhuma okathi yowo, Mwana a David aasenyeriwa, mphironi, ni aari vamwako, mwako mmosaru, awehaka vathi oYerusalemu, Mwene ookhoottiwa. Nto khikhuwela, “Yerusalemu, imara kavi Miyo kitthunne aka wokhuneelani ntoko mwalyakhu n’axaan’awe, masi nyuwo khuhitthuna!”

63 Owo khanatoko orukunuxa mukhalelo Awe, ’okhala wira aHeperi 13:8 ahimnye wira, “Owo mmosaru nsana, olelo, ni mahiku othene.” Muluku aaipanke erutthu, wira akhwe, anivuluxe mwa itampi. Tivo Owo aairukununxe awe Mmansawe, wira akhale mu—Mutthu.

64 Hiyo ninnoona, mwa Yohani Owarya 12:20, aKereku yaahiiwa mwaha wa Yowo. Vano, khaavo mutthu onwerya ophiyererya wiwa mwaha wa Yowo woohikhala wira murim’awe onoomuviha wira amoone Yowo. Ntoko Yobi ni maprofeta a khalai, othene aya yaatthuna omoona Yowo. Tivo, aKereku ala jaaruly’aya wira amoone Yowo. Awo jaaruule wa Filipe, yowo aari ooPetisita, khwira, “Napwiya, naaphavela omoona Yesu.”

65 aKereku yaaphavela omoona Yowo, masi awo khayaawerya omoona okhala wira Owo aari mpani mwa atthu Awe. “Muluku aari mwa Kristu, aataanihaka olumwenku ni Yowo.” Vano hiyo ninnoona wira, mwa yela, aKereku ala khayaawerya omoona.

66 Nto nkawehani moolumo ene Yesu aahimeenry’awe yawo, nto. Owo aahimnye wira, “Epyo ya triku yaahimoreleru vathi, khukhwa, enhkala emosaru.” Mwa moolumo makina, awo khayaakhalakhala aweryaka omoona Owo morukunuwani, mwa namakhupi Owo mwaary’awe-mo okathi ule, okhala wira Owo aaipinthe mw’erutthu ya mutthu. Masi okathi epyo ela ya Triku jaarow’aya omorela vathi, nto Eyo yaamukumiha maloko othene. Owo aaveleeliheriwe aYuta, vekeekhai, okathi ule. Masi epyo ela ya Triku yahaana omora; Muluku owiipithihiwa, mw’erutthu ya mutthu, owiipithihiwa ale oohaamini, masi owuupululeliwa ale owaamini.

67 Mwa Yohani 1, “Wopaceryani naari Nsu, nto Nsu naari ni Muluku, nto Nsu naari Muluku. Vano Nsu naahiipaka erutthu, khukhala ni hiyo, ni hiyo noomoona Yowo, mwana Mmosa-ene a Atithi, oosareya mahala.” Vano, wopaceryani naari Nsu. Nsu muupuwelo woolavuliwa.

68 Wopaceryani, Owo khaari Muluku nnakhala. Vano, nuulumo nahu n’Enkelesi olelo, *Muluku*, nnihimya “ethu enikokhoreliwa.” Moota ery’aya yootikiniha mmuruni. Nyuwo poti omukhaliha mutthu muluku. Nyuwo poti okhaliha ethu p’itthu muluku.

69 Masi mwa Waataana wa Khalai, mwa Maphattuwelo 1, “Wopaceryani *Muluku*,” nuulumo nnihimmwa ti, Elohim. *Elohim* enihimya “Ole onikhala mmansawe.” Moota

nnivirikan'aya nuulumo Elohim, ni nuulumo nahu Muluku. *Elohim* nnihimya “Ole onikhala mmansawe.”

⁷⁰ Hiyo khaninwerya okhala mmansihu. Hiyo khaninwerya okhala oowerya sothene, oowerya-sothene, ookhala mapuro othene, oosuwela-sothene. Elohim iyo enihimya sothene iyo. Hiyo khaninwerya okhala yeyo. Mwiri uwo nyuwo munikhali'anyu muluku, wala e—empa, kehiyo yookhala mmansaya.

⁷¹ Vano, Muluku, wopaceryani, aari Ekumi, Ole Ohinimala. Mwa Yowo saari mikhalelo, nto mikhalelo seiyo khukhala Masu, nto Nsu khukhala erutthu. Yesu aari Nvuluxa. Nto *ovuluxa*, enihimya, “ohokoloxa.” Vaari wira Owo ohaana ohokoloxa, naahaana okhala nipuro nimosa waarow'aya ohokoloxeriwa-vo. Tivo, nyuwo moone, atthu othene khanrowa owerya wona eyo, okhala wira atthu othene wopaceryani khayaari mmupuweloni mwa Muluku. Munnona?

⁷² Nkaaweheni anamukuttho. Okathi awo amoonaly'aya Owo wiisoniherya Mmansawe orateene ni Masu, ele Owo aary'awe, awo yaahimye wira, “Ti Pelizepuli.” Eyo yaahooniherya vatthu vaaphwanyaneya mukhalelo aya. Waari muhina wa muupuwelo wa naanaanano wa nihiku.

⁷³ Masi okathi namuttompe mwamukhani, Owo aamuphwannye awe vamukhora, khumuleela, khumooniherya ethooneryo Awe y'omesiya, mwaha w'omuleela etthu owo iiraly'awe. “Vano,” owo khwira, “Mulopwana, kinoona wira Nyuwo mwa Profeta. Hiyo noosuwela, Mesiya, okathi Owo onirw'awe, Owo onoonihimeerya itthu iya sothene.” Owo aamusuwela Owo ntoko Mesiya, Ole ooreerihiwa, okhala wira Owo aahimaliherya soophaveleya sa Solempwa. Nyuwo khamunoono? [Muthukumano onira, “Amen.”—Mol.] Ikapatte soopiili sa epaphelo saamulikana. Owo, “Hiyo noosuwela wira, Mesiya arwa vale.”

⁷⁴ Vano, alakela Muluku aahaana okumaniha *ela* ni *ile*, wira akhalane oruma nno w'esiinu, ntoko mulipa-owuupa. Masi okathi Yesu orukununw'awe, khwira, “Ti Miyo kinlavula ni nyuwo,” khanaakhanle nuulumo ntoko “Pelizepuli.” Owo aahin'ye mwapu awe wa maasi, khutthimaka arowaka opooma, khwira, “Murwe, mmoone Mulopwana mmosa Yowo okihimeenrye itthu siiraly'aka. Kahiyo Yola Mesiya ene?” Munnona?

⁷⁵ Vano, exeni yinre yela? Ohela Solempwa sa khalai ni musuwelelo ole—ole Yesu aamuvah'awe, exeni yiirin'he yeyo? Eyo yaahimupaka Mesiya. Nto nyuwo mooweha? Naanaanoru, itampi sawe saahileleliwa, okhala wira, wopaceryani, owo aari oovuluxeya, okhala wira owo aari mmuupuweloni mwa Muluku wopaceryani. Vano, eyo yaahinvuluxa, wala yaahimuhokoloxa,

okathi voonaly'awe Solempwa soohimmwa wooniheriwa, sa Yehova, yeyo Owo aakhanly'awe, yeyo Owo okhanly'awe.

⁷⁶ Vano, okathi Yesu orwiiy'awe, vaari wira Owo aarwiiye ni mutthaka wa Nowe, khiwaarowa ovara etthu. Oteka ekalawa, n'ukhuma nittelemaka, khiwaarowa ovara etthu. Masi Nowe yowo aari epantte ya Muluku. Owo iirale mwa enamuna ya mekh'awe okhala wira owo aari w'omekh'awe, ni mutthaka awe waari w'omekh'awe okhala wira yaari Masu yooniheriwaka.

⁷⁷ Khivaaweryaneya Owo orwa ni mutthaka wa Moise, okhala wira khiwaarowa ovara etthu. Moise aari Muluku, mwa epantte emosa, yowooniheriwa. Owo aari masu oowooniheriwa a okathi ule, masi Yesu khaakhanle orwaaka mwa yeyo. Bibilia khaatonko ohimya wira Owo aarowa orwa enamuna yeyo.

⁷⁸ Masi okathi Owo orwiiy'awe, aahooniherya oratteene ntoko wa—Waataana waahimmy'aya wira Owo aamurowa wooniheriwa, nto othene ale yaari oovuluxeya yaahaamini Yeyo, okhala wira yaari miyuupuwelo sa Muluku. Mikhalelo Sawe wopaceryani, saahikhala erutthu, ni soovuluxeya, ni saahihokoloxeriwa wa Muluku. “Othene ale amwaakhenle Yowo, Owo ohaavaha owerya w'okhala aana a Muluku,” okhala wira awo yaari oovuluxeya. Awo yaari okhuma wopaceryani, muhina mwa mooniheryo.

⁷⁹ Vaari wira naaniwerya weemela vaava okathi vakhani, yaakhanle yooweryaneya, ni wuupuwela yeyo, ohiy'ula, Mutthaka w'okathi, miyuupuwelo sowooniheriwa sa Yehova. “Ohinatthi opattuxiwa olumwenku,” hiyo ninnihimeeriwa wira, “masina ahu aheliwe Muliivuruni Mw'ekumi ya Mwapwittipwitthi.” Nto hiyo ninniwerya wona ipantte soopiili, ntoko opacerya wene sihimaly'aka, mwaha wa xeni mmosa okhalaka ootikiniha wa mukina. Ehaana okhala siiso. Yaari siiso okathi wothene. Okathi wothene enikhala siiso, ni okathi wothene enrowa okhala siiso. “Owo aari Nsu. Nto Nsu naahiipaka erutthu khukhala ni hiyo.”

⁸⁰ Vano, Muluku, mwa...ottuli mahiku a Waataana wa Khalai, hiyo ninnoona wira Owo vaamanly'awe waakhumelela athu Awe, mwa inamuna soovirikana, Owo aaniisiipithiha Mmansawe ottuli wa isapala sa texugo. Muluku aisiipithihaka ottuli wa isapala sa texugo, vamukhuneeloni Vawe. Hiyo ninnoona wira, moota Salomoni, okathi waavaherenry'awe empa y'Apwiya, ni isapala iya sa texugo saathomeiwe vale, ekuwo, moota Owo waaruuly'awe ntoko Nlumi na Moro ni ntoko Neeku, khurowa ottuli iwe, khwisiipithiha Mmansawe, w'olumwenku w'ota. Masi, mwa wamini, Isarayeli aanisuwela wira Owo aari ottuli iwe. Awo yaanisuwela wira Owo aari weiwo, hata wira olumwenku w'apakau waahimya exeni. Owo aahiisipithiha w'ale oohaamini. Masi mulipa-owaamini, mwa wamini, aanisuwela wira Owo aari ottuli iwe. Awo

yaanimoreliwa ikharari. Ni Owo aari vamukhuneeloni Vawe, yeyo yaari esiri yuulupale.

⁸¹ Nyuwo moosuwela, mwa Waataana wa Khalai, orowa ottuli w'esapala ele waari okhwa. Vano okhuma ottuli waya t'uri okhwa. Okathi ule okela mOvuwani Mw'awe waari okhwa. Vano osusa m'Ovuwani Mw'awe onikhala okhwa. Eyo yiiranen'ye, vekeekhai, vakheren'ye aya ekuwo oKalvario, okathi ekuwo ekheren'ye aya, ekuwo ya khalai. Vano okhala ota wa Mukhalelo Awe onikhala okhwa. Okathi ule okela Mmukhaleloni Mwawe waari okhwa. Munnona? Eyo enoorukunuwa nno ni nno, sihaana ophwanyiwa Solempwa wira noone nihiku xeni nnikhal'ahu.

⁸² Vano, okathi ekuwo ekheriw'aya oKalvario, mukhuneelo wookhala wowooneya sana. (Masi exeni yiranen'ye? Yaathomeiwe oKalvario, evuuvaka Ephome.) Ntoko awo saakhumihaly'aya ephome, eyakha t'iyakha, ekukutthiwaka empa ya Muluku ni omiseriwaka mukhuneelo, iwe, Muluku, n'emanelo Awe yuulupale ni ya ikuru n'owerya wooverunya, waahikhera ekuwo ele ya texugo ya khalai okhuma osulu mpakha vathi, nto mukhuneelo khukhala wowooneya oretteene.

⁸³ Mwapwittipwitthi, eekeekhai ooloka a Muluku aahithomeiwa wowooneya oKalvario, Mukhuneelo w'ekeekhai, okathi Muluku olinve awe esisapo, Mmansawe; khikhala mmosa wa hiyo, ni khwiisooniherya Mmansawe ntoko Mutthu, wira akhale oolimaleleya ni hiyo, ni hiyo okhala oolimaleleya ni Yowo. Mukhuneelo waari wowooneya oratteene wa Isarayeli othene nihiku nle na Nlivelu.

⁸⁴ Masi, sootakhaliwa, ilimalelo s'axithiti a ikereja a nihiku nle yaarin'aya, ni ilimalelo saya, yaawiipithiheny'aya atthu Mukhuneelo w'ekeekhai. Vaari wira awo yaahisuwela Solempwa, khula ekapatte yaamulikana ntoko epaphelo ya Muchiina. Oprofeta wa Waataana wa Khalai waamukhala woomaliheriwa, ni waahikhala. Ni vaari wira awo yaahiixuttihiwa Solempwa, awo yaamoona Mukhuneelo. "Ntoko Moise," sihimmy'awe va, wira, "mpakha olelo awo arooriipihiwa witho. Nlelo eri vasulu va murima aya." Awo khaanoa.

⁸⁵ Masi, Owo aari Muluku, ohaawa ni Nlivelu. Owo aari Mukhuneelo wooloka waaphwanyaneya wowooneya voomalela. Ntoko siipaly'ahu esipo:

Mmoone, Ole vale wowooneya.
 Ole ori vale, Muxintta oowerya,
 Okhuma okathi Owo okhen'awe ekuwo
 ipantte piili.

⁸⁶ Moone, Owo orwiye, ntoko Mukhuneelo, othomeiwe ene wowooneya ohoolo wa muthukumano. Masi awo, ary'ene vathi va muupuwelo w'atthu. . .

⁸⁷ Vano, alopwana n’athiyana, n’anamakhaliherya a muthukuman’ola, kintthuna kihimye ela kihimuthanlaka mutthu. Masi, mwa moonelo w’olelo, mwa moonelo w’etthu hiyo ekhalenly’ahu va olelo, miyo kinnoova wira ilimalelo s’axitithi, axitithi a mukereja, aawiipithiherya Yela atthu anci-ene. Okhuma okathi Eroho Yowarya varuuly’aya mahiku ala ookiserya, ntoko saahimmw’aya, ni ekuwo yookhereya, atthu anci-ene aneererya ovarelela ilimalelo saya s’axitithi. Ni tivo awo ahinwery’aya wona othhapa nno woomalela, ni murettele, ni itthu Ekereja sirin’aya olelo. Masi, Eyo eri yowooneya voomalela w’ale anaamini.

Owo ohiipithiha Masu, Masu yaalaiheriwe a mahiku ala.

⁸⁸ Vano, ilimalelo soopaka ekuwo. Awo aniira wira mahiku a miiriirya aamala. Mulopwana mmosa aalavunle ni miyo, mulopwana mmosa oolakeya, ooleleya oTucson, Arizona, weiwo onkhal’aka. Miyo kaarina muthukumano oRamada. Nto naahilavula Omuthukumanoni w’Alipa a Nakoso weiwo Apwiya Yesu yaaruuly’aya khwira itthu suulupale. Nto mulopwan’ola muKristu khukirweela, khwira. . . Murumeyi a mukereja, mutthu ooreera murima, nto owo khwira, “Munna Branham, nyuwo muneererya waalokiherya athu okathi w’arummwa,” owo khwira, “nave okathi w’arummwa ovinreene.”

⁸⁹ Nto miyo khwira, “Miyo kinnoovekelani, munn’aka, mukoonihe okathi xeni okathi w’arummwa omanly’aya, mwa Solempwa.” Miyo khwira, “Okathi w’arummwa opacenrye Nihiku na Pentekosite, ni owo oni. . . Pedru aahihimya, Nihiku na Pentekosite, ‘Natiri t’awinyu, ni aan’inyu, n’ale ari ottaiwene, mpakha othene ale Apwiya Muluku ahu anrow’aya owiihana.’ Omanle silini? Vaari wira Muluku nlelo onimwiihana, nto okathi w’arummwa nlelo onimwiiraneya.”

⁹⁰ Tivo nto ti vaavo atthu anci-ene aneerery’aya waattiyela atthu anci-ene, ni ilimalelo saya s’akhulupale, ntoko saary’aya okathi ule. Nto nyuwo munoovonya wona mwaha wa xeni atthu anikhal’aya oothhapa ni ookuxiwa murima vanci-ene. Ni—ni mithukumano iya ti sootikinihaxa, etthu yootikinihaxa, w’atthu akina, okhala wira awo annoona wira awo aatupha mikaano iye. Awo aavikana ikuwo iye, mpakha Ohoolo wa Muluku, vaavo awo animoon’aya natiri ookathi ula wooniheriwa ohoolo w’atthu. Awo annoona etthu Muluku aahimmy’awe.

⁹¹ Mwa Yoweli 2:28, Owo aahihimya, wira, “Mahiku ala ookiserya yaamukhala epula y’elimwe *yoomwaraxeliwa* atthu, mahiku ookiserya.” Miyo kinoona wira nuulumo n’Ekereku vo ti *kenos*, nenno nnihimya wira Owo “orimwiisiittha” Mmansawe. Kahi mwa enamuna hiyo naarow’ahu ohimya wira, ntoko etthu yaari muhina mwa mutthu, Owo iitthaly’awe. Masi, Owo orimwiisiittha Mmansawe.

⁹² Owo oroorukunuwa; *en morphe* Awe. Owo—Owo oroorukunuwa, wa etthu Owo aary’awe, khukhala ele Owo ory’awe. Owo khanatoko orukunuxa mukhalelo Awe. Masi Nihiku na Pentekosite, Owo aahiirukunuxa Mmansawe waary’awe Mwana a mutthu, khukhala Mwana a Muluku. Owo oruule, kahi *n’atthu*. Owo oruule *mw’atthuni*, moone, Muluku mmosaru, wira arowe ohoolo ni muteko Awe, okathi ula muulupale.

⁹³ Owo oohimya mBibiliani, wira, “Naamurwa nihiku nahaarowa okhala othana wala ohiyu, masi okathi wa makaaripi waamukhala Warya.” Vano, nsuwa, mwa mukhalelo w’elapo, nnivenya onikhuma nsuwa ni ninthupwela onikela nsuwa. Nno nsuwa nimosaru, okathi wothene. Vano, okathi, Mwana, M-w-a-n-a, iisoniheny’awe Mmansawe mwa wooniheriwa wa Masu a natiri, wa Isarayeli, atthu a Epantte onikhuma nsuwa.

⁹⁴ Naahikhala nihiku n’ewiriphi. Naahikhalana warya woophiyerya mw’anamarehererya, n’akina, wira nipake ikereja ni miromolelo, ni wiitakanxa mwemmo n’urwa; ni waapehari anamwane, ni waatheliha atokweene, ni waavitha ookhwa, ni sikina; n’ukhala mukereja.

⁹⁵ Masi, okathi wa makaaripi, “Onookhala Warya,” Owo aahimye, “okathi wa makaaripi.” Ni khiyavo Yolempwa eniweyaneya ottipihwa. Nto M-w-a-n-a mmosaru yowo iisiitthale Mmansawe, *kenos*, Nihiku na Pentekosite, oolaiherya wira etthu emosaru okathi wa makaaripi. Munnona? Eyo emmutthariha natiri.

⁹⁶ Mutakanihe epaphelo. Nwehe eniiraneya, ni nwehe etthu Owo ohimmy’awe, nto munimoona vatthu vary’ahu. Mutakanxe etthu iyo. Munooverya wona wuupululiwa wa Yola muulupale ni oowerya. Ilimalelo sihaariipiha atthu owiitho, emara ekina, wa itthu iya suulupale saahimmwe.

⁹⁷ Moise, okathi orwiiy’awe akhumaka vamwako, yowo waavarela Moro, moota orenry’aya musuweliho!

⁹⁸ Moise aahirowa wEjitu khwaahimeerya axitithi a mukereja wira Apwiya Muluku yaahimuthotola ni Nsina na “MIYO KOOKHALA.” Nsina nno nnikhala na naanaano; kahi “Miyi kaakhanle; kinookhala.” Masi, “MIYO KOOKHALA,” mmosaru mahiku othene, mmosaru nsana, olelo, ni mahiku othene. Owo onikhala naanaano. Owo. . . Eyo enlikana n’aHeperi 13:8, “Yesu Kristu mmosaru nsana, olelo, ni mahiku othene.”

⁹⁹ Awo nlelo Masu yaahimmwe. Nto, muthukumano, waari wira olikane ni Masu awo, musuwelelo wa nihiku nla. Anamarehererya yaahikhalana yeyo, oh, masi nla nihiku nikina. Nkoonani nihiku xeni nnikhala’ahu. Vekeekhai ntoko Owo vahaarow’awe orwa, mahiku Owo aaruuly’awe elapo ya vathi, mwa e—mwa enamuna Moise aaruuly’awe, wala khula mmosa wa maprofa aaruuly’awe; khayaahimmwe. Nto mahiku ala

ookiserya, ehimmwe orwa enamuna yela. Kheniweryaneya orwa mw'enamuna ya muhakalaliho wa Lutero. Kheniweryaneya orwa mw'enamuna ya muhakalaliho wa Wesley. Ola okathi w'ohokoloxeriwa. Ola okathi onthhoney'aya otthikela Warya woopacerya wa Mwana, woopacerya.

¹⁰⁰ Oh, moota naarow'ahu wooniherya Solempwa, mwaha wa yeyo! Ni nyuwo mateoloko, hata mwa a epantte xeni y'elapo, nyuwo moosuwela wira Eyo ekeekhahi. Owo natirii. Ti yeyo enaakhaliha atthu ootikinihaxa. Ti yeyo enaapaka atthu ootikiniha, yeyo eniwiihan'anyu. Okhala wira awo... ti... Ekuwo yootaphuliwa, mwa ilimalelo, nto awo annoona Yeyo. Owo mmosaru nsana, olelo, ni mahiku othene. Munnona? Owo ti—owo ti natiri a Muluku, ni hiyo khaninwerya orowa nimuvirikanyihaka yowo, 'okhala wira khivanweryaneya Solempwa ottipihwa. Ayo. Hiyo ninnoona wira Owo aahihimya yeyo. Owo aahiisiitthela mw'atthu Awe. Ni Owo mmosaru nsana, olelo, ni mahiku othene.

¹⁰¹ Moise, vamanly'we orowa wEjitu khuhimya yela, nto Atithi yaahilipiherya mutthaka awe, arw'aka Omwako Sinai, muNlumini na Moro mwemmo, khuvareliha Moro mwako. Hiyo nooweha? Ole aamuvanh'awe natiri, Owo aahimuruuha ni Masu. Owo aahikhalana sooruma. Nto wira akhalane yooruma ela, owo aahaana... Sooruma saari Masu. Masu yiira ahinatthi orwa w'atthu nlelo. Vano, Masu okathi wothene anirwa wa profeta, ni owo aari profeta ookathi ule.

¹⁰² Ntoko, Yesu aari Masu. Yohani aari profeta. Nto Yesu aaruule wa yowo, mmaasini, okhala wira Masu okathi wothene animurweela profeta, woohivonya. Munnona? Masu anirwa wa yowo.

¹⁰³ Vano, Moise, Masu yaamurweenle yowo, sooruma. Nave owo aahikhalana. Vano, mwaha wa xeni? Masu ahinatthi ovahereriwa ni wooniheriwa, Moise aahaana okhuneela owiitho wawe, maana Masu khayooniheriwe voomalela. Awo yaahisuwela wira yaahikhala etthu yiiranan'ye, masi awo khayaasuwela yaari exeni, onyakula n'uruma etari. Mpakha, awo wira, "Alavule Moise, kahi Muluku."

¹⁰⁴ Nto Muluku khwira, "Ahe, Miyo kinimwiira siiso. Okhuma vano, Miyo nkinrwa—tho siisa. Kinrowa waarumihelaka profeta. Vano owo ono... Kinrowa olavulaka mwa profeta Aka."

¹⁰⁵ Vano, vaari wira Moise, ni ikano s'erutthu, (ntoko Paulo, mwa aKorinto Aneenli va, onuupululenly'awe hiyo), aahaana okhuneela owiitho wawe ni ele eri y'erutthu, khivatempe ele y'Eroho okhala ya nttittimiho ni yooripiheliwa owiitho ole oohaamini ehinatthi wooniheriwa wa yowo! Khiyatepa omwiihana... Moise aari ootikiniha. Khivatempe awo owiihanani nyuwo, muvinre epantte ekina y'ekuwo, khukela muNlumini na Moro, khikhuma ni Eparakha! Nto vano nyuwo

muri ookhuneeliwa. Athu khanwerya wona. Awo khanwerya wiiwa sana Yeyo.

¹⁰⁶ “Vaari wira ele y’erutthu ti yoovuwa, khivatempe ele y’ovikana ephattu! Vaari wira ele y’erutthu, yaarina emalelo, yaari wira ekhale yoovuwa, khivatempe Ela ehirina emalelo, okhala yoovuwa!”

¹⁰⁷ Masi, nlelo, Ti yowiipithihiwa. Kahi yowiipithiheriwa mulipa-oowaamini, masi wa ole oohaamini. Owo khanwerya wona Eyo. Muluku okathi wothene onimwiisiipitiha Mmansawe wa ole oohaamini. Ilmalelo sihiipithiha Yeyo. Ntoko awo siiraly’aya okathi ule, awo aniira yeyo olelo.

¹⁰⁸ Eyo ekuwo ya murohoni nrin’ahu vano, vaavo vaary’aya ekuwo y’erutthu iwe. Yoolipihiriwa ni profeta ni Masu oolempwa, mulipa-oolopola, ole onirwa ni Masu oolempwa, wira alakiherye Yawo.

¹⁰⁹ Awo yaanisuwela wira Masu yaari vale, masi khayaasuwela etthu Awo yaahimy’aya. Nto Moise aanilakiherya Yawo. Owo aanihimya, “Yooruma enihimya *Ela*, ni mwah’aya *t’ula*.” Owo aanilakiherya. Nto Awo ahinatthi olakihiriwa, yaari owiipithihiwa.

¹¹⁰ Nto ti siiso siry’aya, olelo, owiipithiheriwa athu, mpakha anikhal’aya owuupululiwa ni owooniheriwa athu voomalela. Muluku, Muluku oowerya, owiipithihiwa mw’erutthu ya mutthu, Masu. Nkawehani. Vano hiyo ninnoona wira yaahipithiheriwa ole oohaamini, masi owuupululeliwa ole owaamini.

¹¹¹ Nkawehani, Moise ahaana okela muNlumini mwa Moro mu, meekh’awe. Khaavo aawerya orowa ni yowo. Eyo khayaari. . . eyo. . . Eyo ennihimeerya exeni? Wira nyuwo khamunikela Mu mwaha wo wiitakaniha nnikhuru na Pentekosite. Munnona? Owo khanatoko wuupululela Eyo nikhuru. Owo omuupululenle mutthu mmosa. Nto ti siiso ery’aya olelo. Nyuwo muniira, “Miyo kiniira mpantta w’e—ekereja. Miyo—miyo kiniira mpantta *w’ela*.” Masi iyo kheniira etthu. Munnona?

¹¹² Nto wa khula mutthu weererya omuthara Moise, otakiherya yeyo, waari okhwa. Nto ti siiso olelo, okhwa wa murohoni, weererya otakiherya. Ti yeyo eni. . .

¹¹³ Ohiy’ula, hiyo nnikela mu, wookhala ottottopelana eriyari sa makhuru, olikanyihana wa mw’erutthuni; mutthu oneererya wira ntoko Yeyo, n’ukhala makhalelo makina; pooti owurya, pooti omupaha sona, axithiyana pooti okhala khula. . . mwa khula enamuna awo anthun’aya, nto ntoko olumwenku, n’ukhala owani ni wona etelevisau, n’itthu sa molumwenkuni, ni nnakhala vo wiisiihana mmansaya okhala aPentekosite. Awo aneererya otakiha etthu yooloka. Awo khanatthi wuupululeliwa, nlelo. Okathi Eyo enuupululiw’aya, ti ya ntittimiho, ni etthu emosa enookhumiha eyo mwa nyuwo okathi munikel’anyu

Mwemmo. Nyuwo munikhala ekuwo. Eyo...Eyo vekeekhai khenivara etthu. Nto otakiherya Yeyo waari okhwa.

¹¹⁴ Moise owiipithihiwa; owo aari Masu makumi w'atthu. Ni olelo, atthu yiipithihiwe anikhala siiso. "Awo ipapheloo soolempwa, anisommwa n'atthu othene." Kahi epaphelo *esya*; masi Epaphelo elempe, yowooniheriwa. Eyo—t'ale anaamini Masu ni natiri a nihiku nla, wira Muluku onimwaraxela Eroho Awe, erutthu yothene, ni iyo ipaphelo soolempwa. Nto mutthu eereryaka otakiherya yeyo mw'erutthuni, eyo enoomupattela. Makhalelo anyu annooniherya ele nyuwo mukhanly'anyu.

¹¹⁵ Emara emosa aahikhala mmiravo mmosa, owo aaroophwanya mulattu. Owo aari mmiravo ooreera murima, masi owo—owo aaronwe mpwaro mwa milattu. Nto mulipa-oophuka khwira, "Miyo kihoophwanyanani nthowa. Miyo kihaana woohukhumuni ni ehukhumu ya mokhwani."

¹¹⁶ Owo khwira, "Kintthuna kiphuke mulattu aka mmansaka." Owo khwira, "Kintthuna kikuxe soopacerya saka."

¹¹⁷ Owo khwira, "Nyuwo khamurina soopacerya. Soopacerya sanyu ti soolamunleni."

¹¹⁸ Nto eyo t'inamuna ery'aya olelo, mwaha wa ekereja ehinrow'aya ohoolo ntoko saatthuney'aya. Ti epacerelo. Ti makhalelo. Nihaana okhala owiivahereryaxa. Hiyo nihaana wamini khula Masu a Muluku. Hiyo nihaana ophavela mpakha Masu ala okhala eekeekhai wa hiyo. Munnona? Munnona? Epacerelo t'ennikhoottiha okela-mo.

¹¹⁹ Masi, emara emosa, (wira yoohiyeni okhuma munluttenu), mpwaro muumu, mmiravo owo khaarina musurukhu. Owo khaawerya oliva. Muulutha waari wa itoolare ikonto sene. Masi owo aahikhalana muulupale awe aaruule khumuliverya.

¹²⁰ Vano, hiyo nookhalana Muulupal'ihu, Yesu, Mwana a Muluku. Nto Owo orwiye onliverya hiyo, hiyo naaminiru paahi niwerya okela muhina mw'ekuwo ni Yowo. Ntoko, Owo ti Moise ahu. Yesu ti Moise ahu oolelo. Moise, ookhuneeliwa, aari Masu makumi wa atthu. Olelo, Yesu, ookhuneeliwa, ti Masu makumi wa atthu, yawo, Yesu Mukereja. Eroho Yowarya, Mwana a Muluku mw'atthu, uupululaka Masu ni natiri a nihiku nla, vekeekhai oniira enamuna emosaru. Etthu emosaru vano.

¹²¹ Nto muupuwele, Moise aahiira yela, ni aahooniherya yela, kahi w'olumwenku wothene, masi w'atthu ookhuma, nloko nimosa n'atthu paahi, awo t'ale yaakhuma w'okhu-... w'okhumani.

¹²² Ni olelo, Eroho Yowarya, wiitho w'atthu aniira, "Ovonihiwa ni Muluku kahiyu w'ekeekhai." Okathi miyo waakoh'aka...

¹²³ Tothoro mmosa aahikilikarela, nihiku nno, mwaha wa mwamuthiyana mmosa, oh, sinnikhalaka miyaha mixexe wala mithanu iwo, aphwanyaneryaka oohalela okhwa, avahaka iwora,

nave Eroho Yowarya khwaavoniha. Tothoro aamukoha yeyo. Owo khwira, “Enikhala sai itthu ila? Vano,” owo khwira, “Miyomiyo . . . Owo muretta aka.”

¹²⁴ Miyomiyo khwira, “Aari yowo. Masi vano aari a Muluku. Owo—owo, owo mutthu Awe vano.” Munnona?

¹²⁵ Nto siiso ennoneya etthu ekhanle, wira Muluku oniihanela okhuma, wira okhummwe ottuli w’ekuwo y’erutthu eneerya otakiherya, ole oneerya wiitakaniha mukereja; kahi Metotista, Patista, Prespiteriyano, vamosa, masi ikereja sa Pentekosite. Owo mwaha wa mutthu mekh’awe. Ti nyuwo ni Muluku. Nyuwo muhaana okela-mo, kahi nikhuru nanyu, kahi ekereja anyu, kahi pastore anyu, masi ti nyuwo murina y’okela-mo.

¹²⁶ Miyomiyo kinthuna wira nwehe mukhalelo mukina wa Moise, okathi owo okhumaly’awe, Nlelo, ary’ene profeta, ary’ene mutthu muulupale owo aary’awe, okathi owo okhumaly’awe ni Masu, atthu yaahoono wira owo aahirukunxiwa. Etthu emosa yaahimukhumelela. Okathi owo okhumaly’awe ni Masu oolipiheriwa a okathi ule, sooruma, owo aari mutthu aarukunxiwe.

¹²⁷ Ni nyuwo munookhala siiso, mwakhumaru-wo ottuli w’ekuwo y’omutthu yeyo yaarowa otheya muthukumano ntoko ola; mutthu yowo aarowa ohoverya ovonihiwa ni Muluku, ni wira mahiku a miiriirya aavira. Nyuwo murookhuma ottuli w’ekuwo elo y’omutthu, ekuwo ya ilimalelo, nto atthu othene anoosuwela wira etthu emosa ehookhumelelani.

¹²⁸ Ntoko munn’ihu oottittimiheya, Jim Brown. Miyomiyo kinaanyiherya wira anci-ene a maPrespiteriyano aasuwela etthu emukhumelenle yowo, okhala wira owo—owo okhumme ottuli w’ekuwo y’elimalelo. Owo ohoona etthu mw’atthu, emukunxe murima, nto owo ookhuma ottuli w’ekuwo.

¹²⁹ Vano, nyuwo, mwakhumaru ottuli w’ekuwo, nyuwo munookhala owooneya woomalela a atthu nto, awo vanwery’aya wona wira yookhala etthu yookhumelenleni. Masu owiipithihiwa, wa ole oohaamini, masi owooniwa woomalela wa mulipa-oowaamini. “Yesu Kristu mmosaru nsana, olelo, ni mahiku othene.”

¹³⁰ Nto, aari Muluku. Mahiku ale, aari Muluku mwa Mutthu, Mwana Awe, Yesu Kristu. Hiyo ninnaamini iyo. Kahi profeta paahi, kahi mutthu pure paahi, mutthu pure. Aari Muluku mwa Kristu; Muluku mwa Mutthu; oMuluku woomalela, mw’erutthuni mwa Mutthu. Muluku mwa Mutthu!

¹³¹ Vano ti Muluku mw’atthu, omalela wa Muluku mwa oMuluku, mw’erutthu Mukereja Mw’awe yothene, aisoniheryaka Mmansawe, amaliheryaka Masu Awe.

132 Vano hiyo ninnoona wira, Muluku, okathi wothene, onnikhalana esapala mwa Yowo. Owo, Muluku, onikhala owiipitha ottuli w'ekuwo.

133 Eyo enikuupuxerya paahi e—ehantisi yamukhani ekhumelenle Okuusini. Nto vo yaahikhala etthoko y'aKristu. Nto etthoko yela y'aKristu awo yaanimwaamini Muluku, ni awo—awo yuupuwela wira—wira Muluku aanaakhapelela mwa sootakhala sothene. Nto, yeyo, Owo oniir'awe. Nto awo yaahikhhalana Junior mmosa mwamukhani, mwammiravo mmosa oophiyaka iyakha thanu na piili wala thanu na ttharu. Vano—vano owo aanirowaka oxikola y'Ettiminku ni aari mwammiravo ooreera murima sana. Masi owo aanoova etarupa, vanci-enexa okathi overunya waavarel'aya.

134 Nto miyo kaahimuleela ela mulopwana mmosa, nihiku nno, okathi artiku ula aakhumme awe mwaha wa mulopwana ola aavonihiwe. Mulaleyi mmosa yola khwira, "Atthu anookhalihani muluku nyuwo, Munna Branham."

135 Vano, owo aari namuulumela, tivo miyo kuupuwenly'aka opwexakasa paahi, vakhani paahi. Wira kihittheke, nyuwo moosuwela, masi ntoko paahi. . . Miyo khwira, "Ti yoorakamelaxa Solempwa, okhala yeyo?" Munnona? Miyo khwira, "Nnari, khekhanle," miyo khwira, "okhala wira Yesu aahiwihihana maprofeta 'amuluku.' Munnona? Ti yeyo, 'Muluku.'"

136 Nto awo khwira, "Vano, nyuwo atthu muneererya okuxa nipuro na Muluku." Eyo kherakamelanxe. Ti yeyo vekeekhai ery'aya. Ti yeyo vekeekhai. Muluku owiisoniherya verutthuni, ntoko Owo saahimmy'awe.

137 Etthoko ela yamukhani, hiyo ninnoona wira. Miyo kimuleela ehantisi ila yamukhani, ekirweenle mmurini mwaka naanaano va. Wira, ohiy'uwu khirwa etarupa, nto maama khumuhimeerya Junior, khwira, "Vano, nyuwo muweleke osulu, mwan'aka, murowe mwarupe."

Khwira, "Maama, kinimoova," owo khuhimya.

"Khiyaavo hat'etthu enrowa owiirihani etthu. Muwele mwarupe."

138 Junior mwamukhani aarupanthi vavale, nto overunya omwaleelaka vacanelani. Nto mwammiravo ola khukhala oonanariwa vanci-ene, owo aanihela muru awe vathi wa mukhumi, ni mnakhala vo aaniwerya wiiwa o—overunya, ahiso wona overunya vacanelani, ni—ni wiiwa etari oruma. Vano owo khwira, "Maama!"

Nto awo khwira, "Muntthuna exeni, Junior?"

Khwira, "Murwe osulu nno murupe ni miyo."

139 Vano awo khuwela exikatta, sintoko khula maama, ooreera murima ni oororomeleya aarow'awe wira. Nto awo khuwela,

khimukuxa Junior mmoononi mw'aya. Nto awo khwira, "Junior, amaama antthuna olavula ni nyuwo okathi vakhani."

Khwira, "Vaareera, maama."

¹⁴⁰ Khwira, "Vano nyuwo muhaana wuupuwela ela. Hiyo ninnirowaka okereja, okathi wothene. Hiyo ninnimusoma Bibilia. Hiyo ninnilompa. Hiyo n'etthoko y'aKristu. Hiyo ninnimwaamini Muluku." Nto khwira, "Hiyo ninnaamini wira, mutarupani ni etthu p'itthu eniiraneya, Muluku ti mukhapeleli ahu."

¹⁴¹ Owo khwira, "Maama, miyo kinnaamini sothene iyo. Masi," khwira, "overunya iwe waakhalaka vakhiviruxa," owo khwira, "Miyo—miyo kimmuthuna Muluku mmosa orina esapala mwa Yowo."

¹⁴² Vano, miyo—miyo kinoona wira, kahi Junior paahi, masi othene ahu nnoona siiso. Okathi onkhal'ahu vamosa, okathi onlompelan'ahu mmosa ni mukhw'awe, Muluku orina esapala mwa Yowo.

¹⁴³ Ni hiyo ninnoona va wira Muluku okathi wothene onnikhalanaka esapala mwa Yowo. Okathi Moise waamoonaly'awe Yowo, Owo aahikhalana espala mwa Yowo, ntoko Mutthu. Okathi Muluku waary'awe ottuli wa ikuwo, Owo aahikhalana esapala mwa Yowo. Nto Muluku, ohiy'ula, Mukereja Mw'awe, t'owiipitha Mukereja Mw'awe ni esapala mwa Yowo. Owo nlelo Muluku mmosaru, ohiy'ula. Hiyo ninnoona eyo.

¹⁴⁴ Masi vano, ntoko kwekwe, ekuwo y'esapala t'eniphwanya ilimalelo. Atthu khanwerya paahi wamini wira owo ti Muluku awiirihaka atthu ale wira siisaale. Munnona? Okhala wira Muluku orimwiipitha Mukereja Mw'awe, musapalani, esapala mwa Yowo. Ti yeyo. Owo ohiipitha wa ole oohaamini, nave owuupululiwa wa ole onaamini. Ayo, mulopwana.

¹⁴⁵ Vano, okathi ekuwo s'elimalelo aya, sa ilimalelo s'akhulupale ni Masu, aniphwanyiw'aya, oh, vekeekhai, olelo, nto enimooneya voomalela, hiyo ninoomoona Yowo, oMuluku emara ekina wowiipitha mw'erutthu ya mutthu. aHeperi 1 ahimnye siiso.

¹⁴⁶ Nto Maphattuwelo 18 tho. Nyuwo munnuupuwela, wira Muluku aari Mutthu, aaphwanyaneya vale, aly'aka, ni alavulaka n'Abrahamu, khuhimya etthu Sara iir'awe mmuxaaxani ottuli Wawe.

¹⁴⁷ Nto Yesu ohimnye wira, "Ntoko saary'aya mahiku ooSotoma, siiso enookhala okathi Onrw'awe Mwana a mutthu." oMuluku wowiipitha tho mw'erutthu ya mutthu! Vano, muupuwele, Yesu khahimnye wira, "Okathi Mwana a Muluku onthun'awe wiisooniherya." Mwa Luka ekapitulu 17, kookupali, ni khino eversikulu 20, 21, nipuro nimoso vaavo, Owo ohimnye wira, "Nto okathi Mwana a mutthu

ontthun'awe wiisooniherya." Mwana a mutthu, atthikelaka mu—mu—Mukereja tho, ooniheriwaka mw'atthuni; kahi Mwana a Muluku, masi Mwana a mutthu emara ekina, atthikelaka Mukereja Mw'awe tho, mahiku ookiserya. Hiyo ninnoona wira Owo oohimya yeyo muhina wa anatiri a Muluku.

¹⁴⁸ Hiyo ninoona etthu ekina, mwa Waataana wa Khalai. Miyo kookhala Yolempwa va, mwa Okhuma. Wira, isapala sa texugo sa khalai, siiraka exeni? Iyo siipithihaka Ovuwa wa Muluku w'atthuni. Isapala sa texugo; nnakhala atthu khayaawerya wona Yeyo, okhala wira yaari esapala yiipithiha Yeyo. Esapala yaari. . . Ovuwa wa Muluku waari ottuli w'esapala.

¹⁴⁹ Nto vano Ovuwa wa Muluku ori ottuli w'esapala anyu. Ti yeyo. Nto ilimalelo khasinoona Owo. Owo ori muhina w'ekuwo, mwemmo Masu Awe mwaary'aya-mo.

¹⁵⁰ Exeni yaari epantte ya muhina w'esapal'ele khalai wu, isapala sa khalai sa texugo?

¹⁵¹ Yowo, "Yahaareerenle wira nitthune Yeyo. Nto okathi Eyo epakiw'aya erutthu khukhala eriyari ahu, Eyo nlelo khayaareerenle wira nitthune Yeyo."

¹⁵² Nto vano etthu emosaru t'eri olelo. Khiyaavo hat'etthu mwa mulopwana wala muthiyana, wira asivele. T'ile eri ottuli iwe. Ti yeyo. "Ahe," nyuwo muniira, "mulopwan'ole, miyo koosuwela wira aari namuhapaliwa. Owo aaniiraka *ela*." Miyo khenikicala etthu xeni iirak'awe. Exeni yiipinthe ottuli w'esapal'ele? Exeni eri ottuli iwe, ti yeyo entthuneya. Ti yeyo, atthu ary'aya ooriipiwa owiitho. Esapala ennaariipiha owiitho atthu. Munnona? Awo aniira, "Miyo kinnuupuwela okathi muthiyany'ole iirak'awe." Miyo koosuwela etthu iirak'awe, masi ankhani vano? Munnona?

¹⁵³ Isapala iye, saatonko okhala mwa texugo, masi vano siniipithiha Ovuwa wa Muluku, eri ni Yeyo emankeene ottuli waya. Yaari mwa mwaxinama, masi vano enimakiha Ovuwa wa Muluku.

¹⁵⁴ Ni espala anyu pooti orukunxiwa siiso, ohiy'ula, wira ekhale empa ya Muluku, Muluku akhalaka mw'atthuni.

¹⁵⁵ Nkawehani. Isapala sa texugo sa khalai, hiyo ninnoona wira, ottuli waya waari. . . Muhina mw'aya mwaari-mo Masu. Ni, Masu, ni mwemmo tho saari-mo mikatthe sooveleelihiwa. Nivuku naamumiseriwa. Nto yaari exeni iyo? Ovuwa wa Shekinah waari mwemmo.

¹⁵⁶ Vano, Masu Epyoo, ni khivanweryaneya Eyo wiima mpakha She-. . . Mwana omana Yeyo. Mwana ohaana okhala vasulu v'Epyo, wira yiimihe Yeyo, wira ethapuluwihe Yeyo. Ni eyo p'inamuna emosa paahi. Nyuwo munikux'anyu Masu, moone, mukuxe Masu a Muluku mmurimani mwanyu, muvolowe mOvuwani wa Shekinah. Nto mwavolowaru, Eyo enooruha mikatthe sooveleelihiwa, Emana, anivahiwa atthu

ale yiivalannye paahi. Etthu emosa enwerya olya yeyo, antthuniheriwa olya, t'atthu ale paahi atthuniheriwe ni ansuwela Yeyo. Paulo oohimya va, "Nitatuxiwaka mwa Ovuwa ni Ovuwa." Nyuwo moone, vookiserya, Eyo enimoorwa mpakha otthikela Ovuwa Waya woopacerya.

¹⁵⁷ Eyo vekeekhai eri ntoko epyo ya ovuwa wa vaasiisu. Epyo ya nluwa, eyo enoomorela vatthayani. Epyo ya nakhuwo enoomorela vatthayani. Etthu yoopacerya t'ivi? Enoophutuwa, ni othapuluwa vakhani. Vano enikhala nikala. Vano, okhuma nikala, entthikela epyo aya yoopacerya.

¹⁵⁸ Vano, eyo ti yeyo vekeekhai Ekereja yiiraly'aya. Eyo ekhumme wa Lutero, Wesley, nto vano entthikela tho Epyo aya yoopacerya, entthikela Ovuwa Waya woopacerya, otthikela Ovuwa Eyo waary'aya-mo wopaceryani. Mwana ovennye Onikhuma nsuwa, ti Mwana mmosaru onooniherya etthu emosaru Onikela nsuwa, arukunuwaka mwa Ovuwa ni Ovuwa. Yaahirukunuwa okhuma epakau, mpakha Lutero; okhuma wa Lutero, mpakha Wesley; okhuma wa Wesley, mpakha Pentekosite; erowaka erowaka, erukunuwaka mwa Ovuwa ni Ovuwa, eruhaka Emana yowiiipithihiwa.

¹⁵⁹ Nto vano Eyo yoottokottha, wira emuruuhe Yowo siisaale ntoko Owo saary'awe wopaceryani, muteko Awe mmosaru; Yesu mmosaru, owerya omosaru, Eroho Yowarya emosaru. Mmosaru Yole aakhurunwe Nihiku na Pentekosite, ti Eroho Yowarya emosaru eniisooniherya olelo, mwa Ovuwa ni Ovuwa, ni Ovuwa. Ni etthikenle Epyo Aya yoopacerya, ni opatiiso wa Eroho Yowarya; ni miiriirya mimosaru, sootikiniha imosaru, opatiiso omosaru; muthinto mmosaru w'atthu, yiiraka enamuna emosaru, ni owerya omosaru, moonelo mmosaru. Eyo enikhuma mwa Ovuwa ni Ovuwa. Nto voottharelana enrowa, "Otatuxiwa mwa Ovuwa nno, ekhalaka erutthu ntoko erutthu Awe Yowo yoovuwa, weiwo hiyo onrow'ahu omoona Yowo." Abrahamu aahoona etthu emosaru.

¹⁶⁰ Vano nwehe. Hiyo ninnoona moota eyo erukunxiw'aya. Opacerya oKalvario, hiyo ninnilattuliwa okawana Ovuwa Wawe. Vano, mwa aKorinto Oopacerya 12, "Hiyo noopatisiwa mw'Erutthuni Mw'awe. Ni Eroho emosaru hiyo othene noopatisiwa." Kahi ni "maasi" mamosaru. "Eroho emosaru, hiyo othene noopatisiwa." Ti yeyo, vano, nto vo hiyo nnikhala epante a Yowo.

¹⁶¹ Miyo kinroromela wira nkinoopisihani. [Muthukumano oniira, "Nnari."—Mol.] Munnona? Kinroromela wira nnari.

¹⁶² Masi, vekeekhai eri ntoko wiiwanana w'esipo wuulupale onruma, wala yiiraka eteaaturu.

¹⁶³ Miyo nkinsuwelaxa vanci-ene enihimya mwaha wa wiiwanyeya w'esipo wala eteaaturu. Masi miyo koono etheiheryo yela. . . Miyo kaahimy'aka *Carmen*, okathi mwan'aka

mwamuthiyana n'akina yaary'aya mwemmo. Nto awo—nto awo yaakumiherya mwa wiiwanana mwemmo, mwa *Carmen*. Awo yaamukumiherya. Muzika waa—waa—waarumiha etthu emosaru.

¹⁶⁴ Eyo p'inamuna siry'aya okathi nyuwo onipatisiw'anyu ni Eroho Yowarya, mwa Kristu.

¹⁶⁵ Vano, moone, anci-ene a nyuwo aasoma wala ahiiwa ehantisi ya mulipa-oorattela muulupale ooRussia yowo orattenle esipo *Pedru Ni Mwiici*. Ni moota owo, awo anlakhery'aya yeyo ni acece n'itthu sothene. Nto khula mmosa onisuwela ehantisi iyo, onisoma vapapheloni, ni oniiwa wiiwanyeya w'esipo iwo, moota enrum'aya, eteaaturu, erumaka, vano, awo annisuwela khula erukunuwelo. Awo anniwerya oweha yeyo *va*, ni wona erukunuwelo.

¹⁶⁶ Masi, vano, exeni eniiraneya vaari wira—vaari wira mulipa-oorattela onolepa etthu emosa, nto ninoona wira eyo kherumme oratteene? Ninnoona nto wira yookhala etthu eniiraneya. Yookhala etthu enihaleela, okathi hiyo oniwoon'ahu. Ole orattenle opanke ni olempe, nto vo wiiwanana wa ikaruma orumihaka, onarumiha esipo yoovonyeya. Yookhala etthu evonyen'ye. Mulipa-oweettiha ovan'he mweettiho woovonyeya. Munnona?

¹⁶⁷ Nto owo t'uri mulattu aya olelo, axinn'aka maLuterano, axinn'aka aPatista, axinn'aka aPentekosite. Axinn'aka othene a miromolelo sothene soohiyana-hiyana, ti yeyo. Munnona? Nyuwo muneererya okumiherya esipo erumihiwe mahiku a Lutero, Wesley, siiso, okathi e, vekeekhai, Epaphelo ya muzika va enooniha wira nla nihiku nikina. Munnona? Munnona? Munnona? Khivanweryaneya hiyo okhala muhina mwa warya wa Lutero; owo aari mulipa-oorehererya. Hiyo ninnittitimiha epa—epante awe, masi hiyo noorumiha eyo. Hiyo nri *vaava* va ottuli w'Eliivuru vano. Munnona? Nihi—nihirumiheke siiso.

¹⁶⁸ Vano, enamuna emosa nyuwo enrow'anyu ophiyererya owerya wira yeyo, axinn'aka, t'ila. Ni axinna a mulaponi, a mapuro oovirikana mulaponi, miyo kaatthuna kihimye wira, eri enamuna emosa paahi ya muli—mulipa-oweettiha owo wira. Owo ohaana okela Murohoni emosaru yeyo mulipa-oorettela mwaary'awe-mo, nto owo onoowerya. Nto okathi Ekereja, wiiwanyeya w'esipo Mmansaya, vaavo olumwenku oniweh'aya miiriirya ni sootikiniha; okathi Ekereja, ni Mulipa-oorattela, ni mulipa-oweettiha, othene anikel'aya Murohoni wa Mulipa-oorattela.

¹⁶⁹ Nto okathi awo aniir'aya, “Mahiku a miiriirya aamala,” eyo khenrumiha esipo oratteene.

¹⁷⁰ Masi okathi anikel'aya yeettaka muhina Mwaya orateene, ni Eroho yeekeekhai ya Yelo; eniiriwa sai yeyo mpakha Eroho, ya Mulipa-oorattela okhuruwa? Amen. Vano nyuwo

mwaairaka, “Mahiku a miiriirya khanavire,” wiiwanyeya w’esipo onookhuwela, “Amen!” Okathi onrumih’ahu, niireke, “Yesu Kristu mmosaru nsana, olelo, ni mahiku othene,” wiiwanyeya w’esipo onookhuwela, “Amen!” “Munimwaakhela owerya numala ela Eroho Yowarya wookhuruwelani.” Wiiwanyeya w’esipo onookhuwela, “Amen! Miyo kihaakhela!” Khokhanle tho waanyiherya mwaha wa yeyo nto. Wiiwanyeya wothene w’esipo ori woowiiwanana ni Masu. Onoorowa... [Munna Branham pnoopa ikuphi vara vararu—Mol.] Ti yeyo. Oh! Eyo etthu yootepa oreera. Mulipa-ooweettiha ni Mulipa-oorattela ahaana okhala mwa Eroho emosaru. Siiso tho alipa a muzika ahaana okhala mwa Eroho emosaru, wira akumiherye yothene. Nto olumwenku onootthuna osuwela etthu eniiraneya.

¹⁷¹ Komunismu awo animuhimy’aya, nto akeettiha murima ni yeyo, ni mikeliheryo iya sothene ni itthu sothene sikina, ni evalaanelo. Oh, ikharari! Etthu iyo, ithiru iya sothene, Orwa w’Apwiya ory’ene vakhiviru, yookhala etthu ehinruma oratta-ene. Kinaanyiherya wira mulipa-ooweettiha oro... Alipa-ooweettiha arookhuma Murohoni mwa Mulipa-oorattela.

¹⁷² Hiyo naphwanyaru Eroho ele ya Mulipa-oorattela, owerya yole wa Muluku woopacerya Bibilia ohimme awe wira, “Atthu a khalai yeettihiwa ni Eroho Yowarya wira amulepe Bibilia ola,” nyuwo munimoona ikapatte iye piili s’epaphelo sa Muchiina olikana, oratta-ene ntoko Bibilia a Muluku ni mulipa-owaamini anlikan’aya, okhala wira awo oowanli aya ari mwa Eroho emosaru. Oowanli aya etthu emosaru. Awo anoolikana oratta-enexa. Etthu hiyo entthun’ahu olelo t’alipa-ooweettiha, ti yeyo, otthikela Masu, otthika ni wamini Yawo vekeekhai ntoko Awo ahimaly’aya. Nto munoomoona Muluku, Yowo mwanene. Eyo ti wooniheriwa. Eteaaturu yookhalihwa y’ekeekhai.

¹⁷³ Olelo, eniiriwa, “Ahe, Owo Muluku a ehantisi. Hiyo noosuwela wira Owo aahilapuwa Ephareya Yooxeerya. Owo ohiira sothene *iya*. Ni Owo aari mu—muttukutthani mwa moro, n’ana aHeperi.” Eniphwanyihani Muluku a ehantisi, kahiyo, vaari wira Owo kahiyo mmosaru olelo? Mutthu okathi wothene onimuttotopela Muluku mwaha w’etthu Owo iiraly’awe, uupuwelaka etthu Owo onrow’awe wira, nave ahisuwelaka etthu Owo onir’awe. Eyo eri mwa mutthu wira siiso. Nto etthu emosaru olelo, axinn’aka. Eyo etthu emosaru tu. Oh, wulu!

¹⁷⁴ Nrowe nihokolowe nikhalihe esipo oruma oratteene, vaavo atthu a molumwenkuni anrow’aya wona. Yesu ohimnye wira, “Miyo kathomeiwaru mulaponi mu, Miyo kinimwaaruuha atthu othene wa Miyo.” Ni, “Owo mmosaru nsana, olelo, ni mahiku othene.”

¹⁷⁵ Mwaahiye alipa-ooweettiha akele Murohoni, ni alipa a muzika ni Mulipa-oorattela, itthu sothene sinookhala sana.

Nto hiyo nri, khonikhala waanyiherya mwaha wa yeyo, hiyo ninsuwanyeihiwa ni Yowo nto. aHeperi 13:8 ahimmye wira, “Owo mmosaru nsana, olelo, ni mahiku othene.”

¹⁷⁶ Hiyo ninsuwanyeihiwa ni Yowo mwa Miteko 2. Hiyo ninsuwanyeihiwa ni yawo, n’upatiiso omosaru, etthu emosaru. Sothene Owo aary’awe okathi ule ni sothene Owo ory’awe, sothene Owo aary’awe ni sothene Owo ory’awe, hiyo na yeyo. Ti yeyo vekeekhai.

¹⁷⁷ Vekeekhai vakhala wira kintthuna okhala mutthu a wAmerika ekeekhai, miyo kihaana osuwanyeihiwa n’itthu sothene owo aary’awe, itthu sothene owo ory’awe. Miyo kihaana osuwanyeihiwa ni yowo, kaakhanleene mutthu a wAmerika eekeekhai.

¹⁷⁸ Kaakhanleene mutthu a wAmerika, weso kaahipakhuwa oPlymouth Rock. Amen. Kaahikhuruwa, kaakhanleene muAmerika. Ni nyuwo; nyuwo mwaahipakhuwa oPlymouth Rock n’axitithi anawetta. oPlymouth Rock, okathi awo yaapakhuwaly’aya iwe, miyo kaari ni yawo; ni nyuwo mwaahikhala, atthu othene.

¹⁷⁹ Miyo kaahettiha ekhavalu ni Paul Revere, mphironi, wira kaalopole mwaha w’ehasara. Vekeekhai ti yeyo.

¹⁸⁰ Ohitto nno oValley Forge, kaahilapuwa muro wooriirya Delaware [Muro wa wAmerika—Mot.], ni nikhuru n’atoropa yawo, nusu na yawo, yahaawanre ixapattho. Miyo kaahilompa ohiyu wothene ni George Washington, khalairu. Kaahimulapuwa Delaware ni yoowoona mmurimani mw’aka. Hiyo n’atthu a wAmerika. Ayo, mulopwana. oValley Forge, vekeekhai kaahilapuwa.

¹⁸¹ Miyo kaahixukhuru n’axitithi oopacerya a Oxukhuru Kaahimuxukhuru Muluku. Kaakhanleene mutthu a wAmerika, kaahisuwanyeihiwa iwe vameesa vale.

¹⁸² Kaakhanleene mutthu a wAmerika eekeekhai, kaahisuwanyeihiwa okathi weemenly’aka ni Stonewall Jackson.

¹⁸³ Kaakhanleene mutthu a wAmerika eekeekhai, kaahisuwanyeihiwa Onirani w’eCha oBoston, ayo, mulopwana, okathi hiyo waakhontte ahu wootothiwa. Ahe, miyo ka mutthu a wAmerika eekeekhai. Miyo kaahisuwanyeihiwa iwe ni yeyo. Ayo, mulopwana. Oh, wulu!

¹⁸⁴ Miyo kaahirumiha Esiinu ya Otaphuwa, nihiku noopacerya na 4 a Julho, 1776. Kaahirumiha Esiinu ya Otaphuwa va khuhimya wira hiyo n’atthu ootaphuwa. Wira kikhale mutthu a wAmerika eekeekhai, miyo kaahaana wira yeyo.

¹⁸⁵ Miyo kaahisuwanyeihiwa ni ehaay’awe Okhottoni, okathi munna aawanann’awe. Kihaana ovilela ehaya awe, ntoko sinvilel’aka ovuwa wawe. Kaakhanleene mutthu a wAmerika,

kihaana okhala. Miyo kaahisuwanyeihiwa ni yowo. Ayo, mulopwana.

¹⁸⁶ Miyo kaahisuwanyeihiwa oGettysburg iwe, okathi Lincoln aalavunly'awe. Ayo, mulopwana.

¹⁸⁷ Miyo kaari Osisiro y'oWake, vasulu va irutthu iye soovuva ephome sa anatoropa. Kaahivenya Osisiro y'oWake.

oGuam, kaahikhaliherya oweliha epanter'ele.

¹⁸⁸ Miyo ka mutthu a wAmerika eekeekhai. Amen. Sothene owo ory'awe, miyo ka yeyo, kinnikhala owiisinnuwihi ni yeyo. Ayo, vekeekhai. Sothene Amerika onikhal'awe, sothene ory'awe, miyo nlelo ka yeyo, wira kikhale mutthu a wAmerika. Itthu sothene owo aary'awe, miyo kihaana okhala, okhala wira kinsuwanyeihiwa ni yowo.

¹⁸⁹ Etthu emosaru, n'ukhala muKristu eekeekhai, nyuwo muhaana osuwanyeihiwa ni yeyo.

¹⁹⁰ Miyo kaahilaleya ni Moise, ni ol-. . .wala ni Nowe, khwaalopola atthu mwaha w'olamuliwa waarwa; wira kikhale muKristu eekeekhai.

¹⁹¹ Miyo kaari ni Moise vamiwani waavarela. Miyo kaahoonu Nlumi na Moro. Kaahoonu Ovuwa Wawe. Miyo kaari ni Moise moothakoni mme, wira kikhale muKristu. Miyo kihaana osuwanyeihiwa ni itthu sothene Muluku aary'awe, wira kikhale muKristu. Miyo kaahoonu ovuwa Wawe. Kaahiiwa Nsu Nawe. Muheererye okivalaanyiha yeyo ni soolavula sanyu vano, 'okhala wira miyo kaari weiwe. Miyo koosuwela etthu enlavul'aka. Miyo kihoona yaakhumelenle. Ayo, mulopwana.

¹⁹² Miyo kaari Ophareya Yooxeerya, okathi woonaly'aka Eroho ya Muluku yaakhurunw'aya khikawanya maasi epante emosa; kahi olapuwa vasulu va nikuttha na mitathi, ntoko eneeriw'aya ohimmwa olelo, masi alapuwaka ephareya yoophiyaka metto miloko mithanu na xexe [27m]. Miyo kaahoonu Eroho ya Muluku. Kaaheetta ni Moise vathi vale voovuuma, nno ni nno w'Ephareya Yooxeerya ele.

¹⁹³ Kaahikhala Omwako Sinai khoona etari n'uverunya omoraka. Kaahilya Emanu ni yawo iwe. Kaahiwurwa Vamwala vale. Nlelo kiniira yeyo ohiy'ula. Miyo kaahisuwanyeihiwa n'alipa-oolya Emanu. Kaahisuwanyeihiwa n'ale yaawunrye Vamwala vale.

¹⁹⁴ Miyo kaahisuwelihiwa tho okathi Yoxuwa oopaly'awe nlope, nto ixiri s'oYeriko khuphomowa.

Miyo kaari mulittini mw'akharamu ni Daniyeli.

Miyo kaari muttukutthani mwa moro n'ana aHeperi.

Miyo kaari Omwako. . . n'Elia Omwako Karmelo

¹⁹⁵ Miyo kaari ni Yohani Mpatisa, ni ohoolo w'alipa-owuulumela ale. Kaahoonu Eroho ya Muluku ekhuruwaka.

Kaahiiwa Nsu na Muluku wira, “Ola ti Mwan’aka onimphentexaka mwa Yola Miyo onnikisivela okhala.” Ayo, mulopwana. Vekeekhai miyo kaahisuwanyeihiwa ni yowo. Vekeekhai ti yeyo.

¹⁹⁶ Miyo kaahisuwanyeihiwa vale vamahiye va Lasaru, okathi Owo aamuhimunx’awe Lasaru. Miyo kaahisuwanyeihiwa, ni muthiyana v’ehimeni, okathi Owo aamuhimenry’awe itampi sawe. Ayo, mulopwana.

¹⁹⁷ Vekeekhai miyo kaahisuwanyeihiwa ni Yowo mokhwani Mw’awe. Ni kaahisuwanyeihiwa nihiku na Pasika oopacerya. Miyo koohihimuwa ni Yowo mokhwani. Miyo kinnisuwanyeihiwa ni Yowo mokhwani Mw’awe.

¹⁹⁸ Miyo kaari n’ale emiya emosa ni miloko miili, empa y’osulu. Miyo kaahisuwanyeihiwa ni yawo iwe. Hey! Miyo—miyo kiniisoonna okhala natiini. Oh, wulu! Miyo kaahisuwanyeihiwa iwe. Miyo ki mmosa a yawo. Miyo kaahisuwanyeihiwa. Miyo kirina musuwelelo mmosaru awo yaarin’aya. Miyo kaari weiwo okathi yiiranen’ye aya, wira kikhale muKristu eekeekhai. Kaahikhalela onamoona Epheyo yowaakuva ni ya ikuru erw’aka. Kaahikhela onamoona yeyo. Kaahoonna owerya wa Muluku okathi ottikinny’aya. Miyo kaari n’ale yaalavula ilavulelo. Miyo kaahoonna mureeriho orwa mme. Miyo kaari ni yawo. Miyo kaahisuwanyeihiwa ni yawo okathi Eroho Yowarya yaapaceny’aya olavula mwa ilavulelo, ni yawo.

¹⁹⁹ Miyo kaari ni Pedru, ohoolo w’alipa-oowuulumela mwa Miteko 2, okathi olalen’ye awe ehapari yuulupale owo aalaleny’awe. Kaahisuwanyeihiwa ni yowo. Ayo, mulopwana.

²⁰⁰ Mwa Miteko 4, okathi yaathukumanans’aya vamosa, kaari ni yawo okathi empa yaattikinyen’ye aya. Vamanly’aya muthukumano wa mavekelo, empa yaahittikinyeya mwemmo awo yaaris’aya—mo. Miyo kaahisuwanyeihiwa iwe ni yawo.

Kaahilaleya ni Paulo wAeropako. Ayo, mulopwana.

²⁰¹ Miyo kaari ni Yohani Osisiro y’oPatimu, khoona Orwa Wawe waneenli.

Kaari ni Lutero morehereryani.

²⁰² Miyo kaari ni Wesley, niwuni na moro nle; naakumihiwe vamooroni, okathi ekhotto yuulupale n’ikereja Anglikana. Miyo kaari weiwe ni yowo.

²⁰³ Ni va miyo kiniphwanyaneya ohiy’ula, 1964, oFiladelfia, Pensilvania, oosuwanyeihiwa nnikhuru nimosaru, ni musuwelelo mmosaru. Miyo kihaana okhala, wira kikhale muKristu. Miyo kihaana okhala oosuwanyeihiwa vaavo Masu a Muluku anikhal’aya oowooniheriwa. Miyo kinsuwanyeihiwa nnikhuru nnoonna Eroho ya Muluku.

²⁰⁴ Miyo kinsuwanyeihiwa nnikhuru nimosa ninsuwela wira Owo ohuupululiwa, ninsuwela wira Owo mmosaru nsana, olelo,

ni mahiku othene, ninsuwela wira Ela kehiyo okhapelela. “Ti Yesu Kristu mmosaru nsana, olelo, ni mahiku othene.” Miyo kinsuwanyeihiwa nnikhuru nenno va, ohiy’ula. Enamwi, yiihaniwaka nikhuru n’atthu owiikawanya, hata wira nikhuru n’anamathipelela, mwaha wa Masu a Muluku. Masi, “Miyo nkinuuleliwa muru Ehapari yooreera ya Yesu Kristu, okhala wira Eyo owerya wa Muluku wo woopowa,” ni miyo ki mmosa aya. Miyo kiri ni ipaphelo sikumi seiyo sihimaly’aka, soolipiheriwa, Muluku owiipitha mwa mukhalelo wa mutthu, mw’alopwana n’athiyana. Oh!

205 Muluku mwa *en morphe* Awe tho, ohiisooniherya Mmansawe ni ohiisuweliha Mmansawe w’atthu Awe. Mwene muulupale Yowo aahin’ye Ovuwa Wawe. “Okathi vakhani olumwenku khunrowa okoona tho Miyo. Kinrowa okhala owiipitha w’awo. Masi nyuwo munookoona, maana Miyo kinrowa okhala ni nyuwo, hata mwa nyuwo, mpakha w’omalelani, kirukunuwaka okhuma Luteru mpakha Wesley, kirowaka kirowaka, mwa Ovuwa ni Ovuwa. Miyo nlelo ka Muluku yole aakhanle, atthikelaka Ovuwa woopacerya.” Aleluya!

206 Owo ookhera khula ekuwo ya muromolelo, mikaano sothene sa nsu. Nsu nenno nniira, “Oh, ole onamathipelela,” Owo oovikana yeyo. Nsu naakhumme iwo, khwira, “Oh, atthu ale anamukhw’anepa,” Owo oovikana ekuwo eyo. Ayo, Owo oovikana. “Oh, nyuwo khamunwerya wira. Nyuwo khamuhiyo hat’etthu woohikhala nikhuru n’anamathipelela.” Owo oovikana eyo. “Nnari etthu iyo ntoko ovonihwa ni Muluku.” Owo oovikana eyo, oh, wulu, maana Masu Awe ahimye wira Owo aamuvikana. Khivanweryaneya oxintta Masu a Muluku.

207 Nto Owo oniphwanyaneya vo, nlelo, ohiy’ula, Muxintta oowerya, opacerya okathi Owo okhenry’awe ekuwo Metotista, Patista, Prespiteriyano, khula muthinto mukina w’ekuwo. Owo nlelo oniphwanyaneya eriyari y’atthu Awe, ohiy’ula, oohixintteya n’ilimalelo. Mwaahiye atthu ahimye etthu antthun’aya, yiire etthu antthun’aya, etthu p’itthu awo entthun’aya. Muluku onoorwa, avikanaka mukaano yowo wa nsu.

208 Nto muupuwele, kinihimeeriwa wira, okathi ntteeke ninvikan’aya vekeekhai mukaan’ole wa nsu, khakhanle makiseryo y’eyakuvelo aya.

209 Miyo kinimooleelani, okathi onvikan’anyu mukaan’owo wa ilimalelo, wira “Yesu aari wu khalai, nto Owo kahiyo vano,” nyuwo mwattemulelaru wira Owo mmosaru nsana, olelo ni mahiku othene, khakhanle makiseryo w’etthu Muluku onwery’awe wira vamuthukumanoni vene vaava, ni wooniha olumwenku ula etthu atthu antthun’aya: kahi efeera ya molumwenkuni, masi muhakalaliho wa mulaponi onrowa osarihiwa n’upatisiwa ni Mukhalelo wa Muluku mukumi,

en morphe aisuupululaka Mmansawe mw'erutthu ya mutthu. Aleluya! Miyo kinnaamini.

²¹⁰ Opwexa khula mukaano, khula ekuwo, khula ekuwo! Khiyavo yaawerya wiipithiha Mukhalelo Awe. Atthu yavoliwa etala mmurimani mw'aya, yookhala ekuwo elikanne wira ekheriwe. Nyuwo pooti olipa ni yeyo. Mukhere khula ekuwo, ni Eroho Awe Yowarya yuulupale!

²¹¹ Nto Owo oniphwanyaneya va, ohiy'ula, Muxintta oowerya, mmosaru nsana, olelo, ni mahiku othene; aavonihaka aretta, aapatisaka ale oowaamini, vekeekhai ntoko Owo siiraly'awe okathi wothene. Owo ti Muxintta oowerya. Axetwani oohukhummwa anootthyawa. Ayo, mulopwana. Awo okathi wothene anootthyawa, Owo akhalaru vakhiviru.

²¹² Kimalihaka, kintthuna kihimye ela. Yaahikhala e... Koosoma ehantisi emosa, iyakha sinci-ene khalai, ya naviel a mmosa mutokwene. Owo aahikhalana viela mwamukhani a khalai aarow'awe omuthumiha. Nyuwo mootoko wiiwa ehantisi iyo, imara sinci-ene. Nto aatthuna othumihiwa mwaha w'etthu emosa. Nto mulipa-oomweesiha khwira, "T'ani onrowa okivaha *khata-ni-khata?*" Kookupali wira aavahiwe musurukhu wa maluku vakhani, alakela isentavo miloko mithanu, wala etthu siiso. "Onirowa omosa, onirowa vanli, . . ."

²¹³ Ovenya wene, mulopwana mmosa khuvenya ottuli. Owo khwira, "Minutu mmosa paahi." Khurowa khimukuxa. Nihelele wira owo oopale nla:

Yookhala Ephattuwelo yoosareya Ephome,
Enikhumihiwa muntikani mwa Emanuweli;
Okathi anatampi anipwin'aya mohuruwelani,
Annapweteya malep'aya othene oottheka.

²¹⁴ Nto okathi omupwenh'awe vathi, khinaakhanle nitho nowuuma nipuro nle. Nto owo khwira, "T'ani anikumih?"

²¹⁵ Mmosa khwira, "Ikonto thanu." "Ikonto muloko." Nto aari oohihimeya esisapo. Mwaha wa xeni? Mu—muratti ula a viela mwamukhani aarimuupulula esisapo awe w'ekeekhai.

²¹⁶ Oh, munna, murokor'aka, vano mmuhiye Mwiixuttihi a Masu ala, Yowo olempe Yala, Eroho Yowarya yuulupale, attikitthele vamuurani Vawe manlela a mphento, avirihe mmurimani mw'anyu

Yookhala Ephattuwelo yoosareya Ephome,
Enikumihwiwa muntikani mwa Emanuweli.

²¹⁷ Munimoona esisapo yoomalela, ni munoomoona Muluku owooniheriwa okhala owooneya sana. Wira, Owo vekeekhai mmosaru ntoko Owo saary'awe okathi omony'awe Nihiku na Pentekosite, vasulu v'atthu, okathi Owo *kenos* Mwanene, "iisiintthe awe" mwa Yawo. Ti yeyo.

218 Nyuwo muniira, “Munna Branham, miyo kihehererya. Kihehererya. Miyo kinniraka *ela, ele, ni ekina.*”

219 Nihiku nimosa miyo kaarina muthukumano oCarlsbad, Novo Mexico. Nto nirowa mpakha muttupha mmosa w’anantuuthu ohitto iwe. Nto wooneya ntoko wowoopiha, nto hiyo khikhuruwela weiwo. Nto mu—mulopwana, okathi ophiyaly’awe vale nipuro nenla, owo—owo khuttihiya muthuko. Nto, oh, wulu, munniwerya otthokelela mota waaripaly’aya. Waari...Waari mooriipela waaweryaney’aya wooneya v’erutthuni.

220 Nto ti siiso okathi onikhal’aya, noonaka ekereja enivonya osuwela Masu a Muluku; mwaawoonaka axan’ahu axithiyana ooSioni yiiraka moota aniir’aya; mwaawoonaka axinn’ihu aniwurya n’umupaha sona, ni—n’uhimya iperwa soonanara ni itthu siiso, nave nlelo yeereryaka okhalana mulapelo aya mwa Kristu. Oh, wulu, wooriipela. Wooriipela vanci-ene.

221 Hiyo ninnoona ethoonyeryo y’Orwa Wawe. Onookhala... Kwekwe onikhala wooriipelaxa ohinatthi oxa. Nto Ettheneri y’Oxaka enoorwa okhomasa nihiku, ni ohimeerya wira, ni wooniha wira nnimoorwa. Nwehe.

222 Muhina mme, okathi ntipihiw’aya nenlo, aahikhala mwanamwane mwamuthiyana aanla ailipihaka vanci-ene. Aahikhala mwammiravo eemenleene mpararini mwa muhooleli, nto owo aahimoona muhooleli ule okathi aattipihaly’awe muthuko siiso. Nto murokor’awe ole mwamukhani aahalela ohileya. Owo aamukhuwela, atuphaka nno ni nno. “Oh! Exeni enrowa okhumelela ohoolo waya? Mulattu xeni? Mulattu xeni?”

223 Moosuwela etthu owo aakhuwenly’awe? Owo aahimnye wira, “Muhoove, murokor’aka. Ookhala mulopwana mmosa va yowo onwerya opattiha muthuko.”

224 Nwiriwane, murokor’aka, nyuwo poti wuupuwela wira hiyo n’axikhaani ni ooyeva. Masi, muhoove. Ookhala Mulopwana mmosa va Yowo onwerya opattiha Muthuko. Eyo ti Eroho Yowarya. Nyuwo munaamini? [Muthukumano onira, “Amen.”—Mol.]

225 Nuuramihe miru sahu okathi vakhani. Mukilevelele mwaha wo woopisihani.

226 O Muluku muulupale a Wirimu, mwiikhunulaka Mmansinyu, mwiithapululaka Mmansinyu, mwiikhalihaka Mmansinyu oosuweliwa, Mwene muulupale a mOvuwani, mukuxe itaphulelo iya sikhani, ohiy’ula, ni muhiye simorele mmurimani mw’atthu. Ni wira hiyo nimoone Ole ookhunuliwa, Mmosa Yole aakhurunwe khukhera ekuwo ya mpaani mwa Muluku; nto ovenya wene khikhumela ota w’ekuwo ele, khikhuruwa khikela mukuwoni y’omutthu, Nihiku

na Pentekosite; owo onikhala mmosaru mahiku othene, arukunuwaka Ovuwa ni Ovuwa.

227 Nto vano hiyo nootthika ntoko ephattu yothene, eniir'aya, ootthikela Epyo y'ekeekhai, ovenya wene nikhumaka okathi mmosa w'ekereja mpakha mukina. Nto okathi ula wookiserya va, hiyo nri va, nitthikelaka etthu yeyo Yoopacerya yaamonre Nihiku na Pentekosite, wira emaliherye khula Yolempwa, "Warya okathi wa makaaripi," ni "Miteko Miyo sinvar'aka nave tho nyuwo munoovara," ni itthu sinci-ene Nyuwo muhimmy'anyu muhina mwa Masu Anyu.

228 Tithi, akhala mmosa va ohivikanne ekuwo ele nlelo, wala akhala mmosa va aamutakiherya paahi mutthu ovikanne ekuwo ele, mmuvahe mahala ohiy'ula, Tithi. Wira awo amoone Muxintta ole oowerya oniphwanyaneya va, oosareya mahala n'uwerya, wira alevelele. Munivahe, Tithi.

229 Nto miru sahu suurammeene, yaamukhala amosa amosa mu? Akavi, kinira so, yaarowa wira, "Munna Branham, miyo kinivenxa ntata naka. Mukivekelele"? Mukhale ni muru anyu wowuurama, muvenxe ntata nanyu, "Miyo kintthuna kivikane khula ekuwo, mpakha kiwerye omoona Muxintta vekeekhai." Muluku ooreeriheni. Wulu, matata! Osulu mpithela, moonoo woothiyana? Muluku ooreeriheni. Mpithela ottuli? Muvenxe . . . Muluku ooreeriheni. Mukhale naxariya voomalela. Moonoo woolopwana? Muvenxe ntata nanyu, mwiire, "Munna Branham, poti kiryeene muKristu iyakha sinci-ene, masi, vekeekhai, miyo nkinatoko ovikana ekuwo ele. Miyo nkinatthi wira siiso. Miyo nkirina Ele awo yaarin'aya okathi ule." Olelo, hiyo nrina . . . "Miyo ka mwiri wa ntthuulu noovihhiwa."

230 Mukuxe nluwa naaliwe muntthuluni noovihhiwa, nyuwo muhaana weepesa, olemeiha, omiserya, onaaniha. Masi mwiri w'ekeekhai oninnuwa moothakoni mme, muthinto mmosaru wa nluwa, nnikhala ntoko nenlo; khaninkhalana hata maasi vakhani, masi khaavo mwaxikokho onikela-mo. Ti noolipa. Ti n'ekeekhai.

231 Mwaaniwerya olikanyiha oKristu ni oKristu olelo, n'ule waari okathi ule? Mwaaniwerya otthokelela nikhuru nla, yeyo hiyo eniihan'ahu aKristu olelo, khula nipuro mulaponi, okhala ntoko ale yaari vaviraly'awe Pentekosite; weepesiwa n'ulemeihiwa, n'ukhuma ekereja ni ekereja, ni, yahimmwaru etthu ehinoosivelani, nyuwo munavenya n'ukhuma-mo? Nto, oh, mwaniwerya otthokelela yeyo? Nnari. Mulattu aya xeni? Eyo etakiheryo.

232 Michelangelo, yowo opanke elatarato ya Moise, nyuwo pooti ophwanya etakiheryo aya, yookhweyaxa esisapo. Masi, y'ekeekhai?

233 Ole opintanri Olya w'Apwiya, miyo kinoona wira elatarato ele y'ekeekhai yaamukhala itoolare imilyau sene, vakhala

wira mwaamuwerya othuma. Miyo nkinsuwela hata vary'aya. Masi nyuwo pooti othuma etakiheryo aya yookhweya esisapo yoophiyaka etoolare emosa ni isentavo miloko mithanu na mosa ni thanu na ttharu. Pooti.

²³⁴ Nto ti siiso siry'aya olelo. muKristu ookhweya esisapo, etakiheryo, owiitakinxa mukereja paahi, pooti waathuma ni sikaro mmosa wala yo—yoowurya pure. Wala, wa muthiyana oomettha maihi wala oopintari iyano, nyuwo pooti omuthuma n'itthu p'itthu mwa mihapo sa molumwenkuni. Masi khivanweryaneya omukwannya ole ooloka.

²³⁵ Miyo kinnimoona Owo voowooneya, mmosaru nsana, olelo, ni mahiku othene.

²³⁶ Oh, muKristu, khamunthhuna okhala muKristu eekeekhai? Akhala mutthu ohivenxale ntata, munimwiira? Vano, miyo kinrowa olompa paahi. Muluku ooreeriheni. Muluku ooreeriheni. Oh, ti yooreera. Moone yeyo paahi.

²³⁷ Tith'ihu a Wirimu, “Masu Anyu khandthikela wa Nyuwo siiso.” Ti Nyuwo mmulampe natiri. Miyo kintthokererya ohimya wira Nyuwo moohimya Yeyo. Miyo kintthikela ohimya Masu Anyu. Nyuwo muhimmye wira, “Ole oniiwa Masu Aka, ni onimwaamini Ole okirumme Miyo, onookhalana Ekumi Ehinimala.” Nyuwo moohimya.

²³⁸ Nto, Pwiya, hiyo noosuwela wira nookhalana itakiheryo iyo olelo, anci-ene anihimya wira annaamini, ahaaminiki. Eyo enikhala ntoko. Masi, Pwiya, aakhala amosa amosa ooloka, nave.

²³⁹ Miyo kinvekela wira Nyuwo munivahe, paahi mu, ohiy'ula, wira khula mulopwana ni muthiyana, mmiravo wala mwali, hata wira t'elapo xeni, muthinto xeni, ekereja xeni aniir'aya mpantta, O Muluku, mwaasarihe. Wira awo yoone wiisooniherya w'eekeekhai wa Yesu yole olelo, eriyari ahu ene, ntoko Owo saary'awe Nihiku na Pentekosite, okathi Owo iisuupulunly'awe Mmansawe mwa okathi ula, ary'ene Eroho Yowarya. Munivahe, noonaka Masu omaliheriwa, oprofeta wiiraneya!

²⁴⁰ Hiyo ninlikanyiha, olelo, ele eniihaniwa ekereja ya molumwenkuni mmo, Mwaataano wa Ikereja sa Mulaponi, ni olikanyiha yeyo ni natiri oPentekosite? Khekhanle elikanyiheryo, nnakhala. Khaninwerya okatthiha ikuwo sahu sootakatta ni epaphelo eyo.

²⁴¹ Masi, Pwiya Muluku, hiyo natthikelaru v'Ephattuweloni vaavale, wookhala muteko w'orapiha, nto musuwelelo ahu ni Masu a Muluku sinimwiiwanana emosa ni ekhw'aya. Vano, hiyo nnowerya okuxa ele eri yawihu. Munivahe, Pwiya, ohiy'ula, okathi onaavaherery'aka athu ala mmatatani Mw'anyu. Mmuvahe khula mmosa etthu entthun'awe, Tithi. Hiyo ninvekela mwa Nsina na Yesu. Amen.

²⁴² Muluku ooreeriheni. Kooxukhuru, vanci-ene, mwaha wo weemela, olipelela okathi munci-ene. Ni mukilevelele kihoopisihani mpakha ewora muloko ni minutu muloko. Muluku akhale ni nyuwo mpakha onrow'aka owoonani vaasiisu. KinvaHererya muteko vano wa, kinoona wira, wa mulipa-ooweettiha niira.



MULUKU OOWERYA ONUUPULULIWA OHOLO WAHU EMK64-0629
(The Mighty God Unveiled Before Us)

Mutthak'ola wa Munna William Marrion Branham, opaceryawene olaleeriwe ni Enkelesi Esekunta ohiyu, mahiku yettaka 29 mweri wa Junho, 1964, w'Opatthana wa Mulaponi wothene wa Alipa a Nakoso a Ehapari yooreera yoomalela, w'Oteli Bellevue-Stratford oFiladelfia, Pensilvania w'Amerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2019 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org